

童山詩集
五





童山詩集

(五)

李調元撰

童山詩集卷二十九

辛亥上

雨中望金頂山

一山孤立衆山宗。盤繞青螺萬萬重。雲裏長疑披絮帽。雨中偏喜着輕容。人言海內無三島。我道村中第一峯。倚得孤松喚金頂。問他可也受秦封。山頂有松一株。望之如傘。故俗名金頂云。

塔水橋焚惑宮訪月上人留詩二首

淨室涼如水。到來心使清。雨勻花變色。日暖鳥多聲。圃內乾坤小。心中日月明。邇來添百藝。詩字亦加精。聞君逢月朗。獨坐挹風清。有客笛三弄。無人琴一聲。官同禪榻坐。隣借佛燈明。更喜傳衣鉢。高徒譜漸精。道士蒲教緣。從月上學琴。

遊玉京山景樂宮聽道官劉虛靜彈琴二首

到門琴忽止。羽扇出前軒。使請閉雙戶。凝神爲一彈。焚香翔白鶴。度曲引青鸞。此去蓬萊近。微嫌尙作官。邊屋蕭蕭竹。人間無此幽。忽聞過站馬。驚退出關牛。地好偏隣郭。仙居只愛樓。知君日無事。坐對水悠悠。
墨香泉井序

墨香泉在羅江南塔天台山下。向聞玉京山道人劉虛靜爲余言。欲遊未果。今年正月十九。至東山。邀虛靜同遊。乃過芙蓉溪。披荆剪棘。沿江而上。有石曰釣魚磯。亭廢尙餘柱眼。折而東。上有巨石。鐫上天梯三字。爲邑人蘇宇姚大護書。無年月。稍偏。又有石書山高水長四字。失名姓。再上。卽觀音堂。今爲邱氏祠堂。翠竹青松。與怪石相間。旁石楷書釣鱉亭三字。石俱橫臥。刻龜蛇魚鼈之形。其下有泉。滋滋流注。廣三尺許。纔如牛蹄涔。而水黝黑。終年不竭。虛靜指曰。此卽所云泉也。上有隸書三大字。曰墨香泉。並題詩云。泉源混混自天成。最喜長平徹底清。時有文人將墨浣。詎無詩客引觴并。芷香日暖滿芳徑。樹色春深腴古亭。憶昔羲之若聞此。也須醺筆草黃庭。萬曆壬寅仲冬。楚江夏處桂程宗道題。此碑向爲州志所不載。余因採入梓里舊聞。並紀以詩。

我生好遠遊。最近返不曉。聞道南山下。有泉出林表。厥名爲墨香。未到已傾倒。朝來同羽衣。訪此小瑤島。細逕如羊腸。曲磴隨飛鳥。伊誰釣魚磯。投綸餌陽鱉。至今餘柱礎。亭廢已難考。遂登上天梯。便覺衆山小。何年觀音堂。邱祠已改造。翠竹夾青松。小棘扶大棗。亂堆石亦奇。刻劃工頗巧。遙望釣鱉臺。颯沓龜蛇擾。忽聞琮琤聲。俯見琉璃湫。上聲下有黑蛟沉。上有盤龍繞。欲飲愁心黑。成文試手撓。黥黥陰氣多。濁泥阿膠少。借問誰著書。遺下洗硯沼。得非烏玉玦。又爲唐生討。不然松滋侯。曾於此浴澡。復疑元香守。甘靈從人禱。懔懔不能明。誰復探幽渺。細觀泐石人。爲明程宗道。詩固庾信清。隸亦李斯好。生爲羅江人。不識羅江寶。急付小胥牘。留作州乘稿。

偕何鰲峯遊三溪寺二首

不識三溪寺。相攜過石橋。一泉觴始濫。萬里箭如標。風雨逢龍怒。烟霞養鹿驕。到來心共寂。閒坐話前朝。昔有玉川老。于茲坐講禪。塔經千劫火。龕尙一燈然。碑蝕祥符字。田施永樂年。可能衣鉢在。杯渡定應傳。獨遊馬跪寺龍洞。

僧言龍洞多奇石。白晝還須秉燭遊。貪看玲瓏懸佛手。渾忘礪碓觸人頭。撲來蝙蝠火幾滅。踏碎骷髏鬼亦愁。我欲持斤斲山骨。却妨龍睡且須休。送別鰲峯赴京候銓。

連年詩酒對笙歌。此去堪交更有何。今日一杯春酒共。明朝萬里暮雲多。癡心莫學魚緣木。政跡遙看虎渡河。贏得腰纏須放鶴。弋人何處篡罾羅。

劉社長送盆花

自入新年樂事增。每于方外得良朋。不逢酒友卽花友。纔遇琴僧又畫僧。月到池邊同客話。雨來樓上引人登。却嫌尙少遊山伴。踏遍峻嶒萬萬層。

鐵爐溝

華陽曰梁州。別有水名黑。灌注川之半。大抵皆盧色。竭來走神泉。有溪聲不息。夾岸皆野花。藤篠紛如織。中有百尺潭。沈瀟深莫測。天忽傾險糜。如潑萬斗墨。豎石負鼃鼃。橫石臥怒特。崖立狻猊形。灘下鷗鷺翼。

疑昔古冶子，干將煅溪側。又疑永州步，飛來自楚國。不然非屏夷，胡墮西方燹。旁有蔡倫家，慈竹四面植。見客淪龍園，恐是烹鳥賊。自非陳玄輩，不敢同飲食。吁嗟行路難，對此泪沾臆。

三月三日遊浮山飛鳴禪院訪柴豹文和張薌圃明府韻

人生如浮雲，我更浮雲外。好爲逍遙遊，恥作齷齪態。昨日池邊花，春風舞澎湃。安能守殘紅，如女處閨內。忽憶小羅浮，奇峯互相背。三遊安陽城，未到心獨愛。豈無東山屐，寡侶興輒廢。我友柴豹文，平生所傾蓋。近厭潺湲喧，遠伴飛鳴嘖。夜夢思見之，兼覽名山大。朝來乘小輿，樵青攜一對。出門隨好風，便入劉阮隊。忽見十二峯，白雲橫如帶。平步登須彌，身縮小如芥。山浮我亦浮，不辨天纓繫。只恐浮上天，墜地或有礙。邃洞聞飛泉，絕頂流成瀨。凌霄猢猻愁，上梯鮎魚退。丹景失嵯峨，青城遜傀儡。奇哉今日遊，矧又得吾輩。回頭問童冠，此客無乃怪。山澤多龍蛇，相生復相害。世下饒豺狼，此食彼已代。惟有深岩柏，古色今尙黛。夜來山更幽，虛堂萬景會。細和賢宰詩，人籟讓天籟。

浮山看牡丹遲張薌圃不至

僕惟耽臥終成疾，僧愛澆花亦近淫。皁蓋不來天又暮，空山愁絕雨淋淋。

安縣道中四首

神泉不敵井泉香，雀舌還輸獸目張。三月安州逢穀雨，春山到處碾茶忙。柘村東去棗園西，巨石橫江竹徑迷。一路綠陰花事了，隔山無數子規啼。

鐵索橋西有石龕。茂林修竹似江南。何時蠶了向平債。每一峯頭結一菴。
獨槐門挂酒帘新。到處逢迎有主賓。兩次羅浮留我宿。峯峯認得李山人。

西昌道中二首

西山白鷺下晴臯。金婦橋邊水滿槽。磨罷秧田平似掌。一簑夜雨下鵝陂。
村莊處處看薔薇。客路春光漸覺稀。四月農家蠶豆熟。滿籃剝得綠珠歸。

界牌

不下帷人肯下階。等閒十日住花街。老來兒女情偏篤。兩過何家問界牌。

偕何九臯及異齋體齋善長遊石巖菴分韻得石字

何年落伽山。飛來一片石。小虵蠕蠕下。掉尾入巖壁。清泉響笙竽。異花間紅白。三高讀書臺。不見讀書客。

同異齋體齋登松山

山下卽明高氏第簡節祖塋

橫山如軾水如弓。高氏先塋在嶺東。短碣深埋青草裏。邊堆山名斜插白雲中。松經人伐猶巢鶴。卵爲年多有寄蟲。富貴回頭眞似露。野花零落滿蒿蓬。

輓故泰安何明府瑞菴人麟

不見音容嘆閨其。誰知死別是生離。劍南夜雨連牀後。山左秋風祖道時。官罷似天難補石。家貧如地竟無錐。園亭初築身先逝。老友彫零不勝悲。

月上攜琴見訪戲贈二十韻

曉聞剝啄聲。闌人以客告。脚穿遙集屐。頭戴毘盧帽。佝僂道衣長。蹢躅步武跳。右目眇不視。左手折能掉。其後有沙彌。背琴同客到。知是月僧來。迎門撫掌笑。如今釋迦法。半爲俗僧盜。不復問參禪。但解唱佛號。肯顧墮泥犁。方且入強暴。吾師偏不然。解作仁智樂。獨抱思聰琴。彈出山水妙。非但語清奇。實見品高蹈。吾生具隻眼。取人不以貌。今朝不速來。正直吾欲召。洗盞酌春酒。夷然不屑酬。何以慰飢渴。操縵釋罍叫。我有謝童兒。清秀頗知要。願求師指授。孺子尚可教。師曰吾當傳。勾挑便已肖。翻慙六十翁。到老不識竅。

題青社酒樓

小橋斜枕碧溪流。新柳依依蘸小溝。班竹笋香供夏饌。來牟麥老當秋收。此間便是登三島。同樂何須羨五侯。一笑市人誰識我。醉來高臥酒家樓。

馬跪寺長老重疏拍掌池成詩以落之

神境清如此。靈山實在斯。王來驚馬跪。佛去化魚池。湮沒無人問。披搜獨我知。草深圍毚窟。花落網蛛絲。開鑿千年後。成功二月時。小亭分八卦。大廈惜孤支。捐錫趨鄰姥。投錢競里兒。水觀重露面。題句常周施。

羅漢寺訪禮汀和尚

慢說高僧近世無。江南宗派出丹徒。譚禪語帶蜜殊氣。著作爭傳羅漢圖。月到一龕皈馬祖。雨餘萬竹長龍雛。連年閱遍西川祇。只有參寥合配蘇。

贈王魯齋同年

斜陽初下掛鐘樓。有客來同座上謳。晚歲人情同魯酒。少年意氣笑吳鉤。風塵碌碌誰青眼。雲水看看盡白頭。解道功名全是幻。何妨日杖百錢遊。

什邡甯湘維錡明府招飲席上奉酬二律

邇年多傳食。又過什邡候。客豈戴安道。兒真孫仲謀。索書僮小誤。集句古無儔。公有集王右軍牛截碑四言甚古。刻燭聽論史。真堪大白浮。

美釀傾牛乳。佳殽剪龍裙。東畿曾識面。北海又論文。我學鷄甘退。君才驥不羣。醉來書潦草。笑倒耿參軍。時耿參軍在坐。

附

什邡令甯 錡湘維會稽

古蜀名賢盛。於今得李侯。心傾終夕話。面憶十年謀。錯比屋烏好。慚非陰鶴儔。摩挲題寶劍。紫氣斗牛浮。

行囊攜絳帳。走馬看紅裙。安石山中屐。東坡海外文。淡交自忘分。塵吏敢超羣。若論騷壇主。還應讓使君。

再疊前韻奉酬

飯牛終遇主。射虎厄封侯。書祇留雛讀。田皆爲鶴謀。山川難是伴。河漢怖非儔。何處藏名姓。行將卜海浮。

蘼草樹之背。榴花妬煞裙。林中鳥反哺。山裏豹慙文。看劍龍吟匣。聽詩鶴立羣。夜歸逢醉尉。誰識故將軍。

什邡縣

什邡卑濕地。時雨復時晴。字向閒中學。詩多醉後成。萱花垂鵲嘴。豆莢露貓睛。偶向城中過。爭傳小李名。

南籠太守唐堯春自湖南扶母觀至重慶卒喪過什邡不及弔遙作挽詩二首

夢斷湖南信。人驚蜀北魂。乍迸如雨淚。空負兄星奔。十載莊周蝶。三更杜甫猿。同官又同學。安得不聲吞。

本期鄰是卜。近買宅綿竹東門。與堯春宅近。何意旣先回。車過腹應痛。灰然身已頽。

堯春以南籠貶級。捐補候闕未任。全家仰朋友。行李仗輿僮。宋玉江邊宅。誰爲闢草萊。

臨安太守張同年蔭堂玉樹由武功攜眷自蜀之任過綿枉駕醒園見訪不值留詩而去

聞道有姚合。來川訪李頎。不知人已去。翻令主空歸。玉壘雙鳬速。金山五馬飛。猶聽兒輩說。思我頗調飢。

湘維赴省郎君立仁邀遊西湖時荷花初開却寄湘維二首

客遊仍得到官衙。喜接郎君笑語譁。北郭遙連千个竹。西湖初放一莖花。殘碑斷字題雍齒。流水高山憶伯牙。幾日琴堂重把酒。浮踪只恐又天涯。

豈有山人役踐更。漫勞車馬候前程。一肩行李原無定。半面荷花倍有情。雨過芳塘拳睡鴨。日斜柳港坐聽鶯。大蓬山色青如許。東道還期約後盟。

新繁和湯蒔芥建業簪翠亭韻

衛公遺跡處。亭閣發其幽。大雅一龍嘯。巴歌盡鳥啁。荷翻魚暗戲。萍動鴨初浮。窈窕人何在。關雎第一洲。

附

新繁令湯建業薛芥武進

翠柏老千古。新亭敞復幽。水深魚暗度。風靜鵲還啁。星漢當窓列。芙蓉隔檻浮。此中有真趣。何必羨瀛洲。

赴新繁預祝湯薛芥仍用簡州寄懷原韻

介壽何須下里巴。絃歌早已遍千家。滿堂共祝如松柏。有客惟知雪棗瓜。若問謫仙推我李。却慚獻佛借君花。論詩一字心甘服。屈宋何妨遣作衙。

聳翠亭

參天枿蓋影童童。聳翠新看立水中。何必樓高方得月。應知亭敞最宜風。鶯從柳底穿梭似。魚躍淵中破鏡同。畢竟紅顏多命薄。開花無子爲誰紅。

聳翠亭雜詠六首

樓閣居然似畫圖。城陰闕處一亭孤。到來便覺清無暑。要算刀州第一湖。玲瓏四面水光鮮。翠蓋田田六月天。恰似西湖堤畔路。柳梢只欠小漁船。分明人語草橋東。只隔荷花路不通。釣得金鱗三十六。一齊喧動水晶宮。前身應是高常侍。歷遍三川句益奇。贏得庭空諸吏散。竹窓深處課兒詩。

城中亦復有蛙啼。總爲湖深認作溪。自是今年春雨足。水田處處叫秧鷄。
蟬聲何處費尋求。古木森森綠樹稠。最是晚涼宜洗馬。桃花樹下看驂騑。

辛亥六月五日新繁蔣芥湯明府六十初度是日讌集東湖聳翠亭調適由濠趨祝忝居座首天光
樹影清風徐來荷氣襲人酒香撲鼻咸曰今日不可無詩以暢雅懷謬作首聯諸公以次秉筆主人
詩伯也誼不容辭詩成共得二十韻主人郎壻皆能詩例得備書雨村 治齋 謹堂 樂齋 蔣

芥 儀甫 牧堂 泗濱 蘇臺 劍函

令尹懸弧日。新亭初構時。蘭亭重有序。雨村蓮幕盡能詩。清白江無愧。治齋龔黃政可媲。敢持山作壽。謹
堂直指海爲卮。勝會延三益。樂齋冰淵凜四知。開筵爭校射。蔣芥虛牖聽彈棋。松老犀千甲。儀甫菱窺鏡
一池。蟬鳴疎欲斷。牧堂燕舞合還離。草閣橫秋水。泗濱深林漏夕曦。荷香飄冉冉。蘇臺竹動影遲遲。繫馬
長堤外。劍函流觴曲水湄。嘉穀烹鹿脯。雨村野味薦蹲鴟。坐待南薰拂。治齋旁宜絲竹吹。金罇傾綠醕。謹
堂玉樹映丹枝。遠屋雲霞燦。樂齋臨軒錦繡垂。堂前雙鳳舞。儀甫膝下六龍隨。客唱南飛鶴。牧堂星從北
斗馳。雙鳧今可網。泗濱五馬早相期。天上開千叟。蘇臺人間介一眉。龜齡應不老。豈但祝期頤。雨村。

觀音寺苦熱有感

本因熱甚思求雨。待雨來時熱轉多。夜氣正涼方怯暑。世間偏有撲燈蛾。

彭縣謝康侯明府三晉招遊賽丹景新建寶星亭

寶星天上落。化作一拳亭。水湧孤城白。山連九隴青。最宜觀稼到。恰已有絃聽。丹景何須賽。彭門自可銘。
馬脚井阻雨。寄懷甯湘維明府。

一雨竟不住。秋風生暮寒。遊踪泥馬脚。歸翼滯鵬搏。逐虎屨撓易。驅蛇蒞放難。餘生君所賜。感極涕洟瀾。
暑夜宿中和場。

暑氣不肯退。秋宵尙未涼。蒲葵風在手。茗椀雨鳴腸。月出雲還掩。雞鳴鵲尙翔。腐螢爾何苦。猶自炫微光。
自什邡歸夜宿羅漢寺簡禮汀。

欲將四大作禪床。人愧金山玉帶長。留客好心翻咒客。明朝江水漲漂陽。

贈百歲老人王維祥

八旬天子少。百歲老人多。南極星初見。西方佛乍過。問年超絳縣。歷劫數恆河。補服黃金熨。銀牌白玉磨。
家家春浩蕩。戶戶日融和。獨有孤臣淚。恩深聖主波。未逢千叟宴。空祝萬年歌。從此甘淪棄。終身老澗阿。

童山詩集卷三十

辛亥下

秋興二首

屈原撰卜居。王粲賦登樓。出處雖不同。感秋同一愁。我老筋力衰。豈真好遨遊。况復寡素心。遊亦無朋儔。豈無好花竹。荒蕪不自修。豈無好亭臺。有戶多莫由。倉箱亦千萬。豈無稻粱謀。室家非不宜。豈爲缺溫柔。如何春徂秋。車馬尙不休。朝向郵傳過。暮向酒家投。鳳旣失高岡。百鳥羣相啁。虎旣適曠野。犬亦交相嗥。歸與竟何時。毋乃非良謀。鸞鳩笑鷗鵬。知者惟莊周。

我蜀多才人。皆爲文字官。皆不擇細行。又皆竄夷蠻。唐之李供奉。長安酒家眠。朝賦清平詞。暮竄夜郎天。宋之蘇學士。歸院撤金蓮。再貶至儋耳。行歌饁婦前。新都楊修撰。博學冠明賢。械門謫金齒。傅粉雙髻鬟。古人不得意。大抵皆放顛。吁嗟俗眼人。焉能窺聖賢。

秋興第三首題東岳寺壁

小坐西昌寺。軒窓漏夕陽。低昂踏枝雀。斷續隔林螢。世事皆機械。吾生且徜徉。詩成請問目。秋興第三章。

題柴豹文書屋

柴子胷中萬卷該。從師千里蜀中來。數椽茅屋臨江起。十畝桑園背郭開。滿座春風任瀟灑。空庭明月自徘徊。只今誰抱西州慟。惟有羊曇不勝哀。

綿州潘使君招飲觀劇力辭催役不遜被斥進譖不得已復赴席戲占

生來嬾性愛山林。每夜招留實不禁。魚鑰已收伶未散。牛膏見跋客仍吟。不妨曾子成三虎。幾使王良獲十禽。一語不交仍復坐。歸來又是四更深。

玉京山訪琴道官劉虛靜時戴劉二生先在

步履玉京山。景樂園虛敞。山靜寂無人。但聞棋聲響。戶外有屨二。排闥竟入幌。不復論主賓。脫帽同抵掌。地既曲且幽。天氣亦清朗。秋陽曝人背。茶罷汗流頰。菊花翻東籬。淥竹映西廠。雨肥蕉葉大。林深石芝長。香櫟何復郁。乃知此處廣。贈我攜袖中。芬芳自天上。本鮮俗累牽。又獲同心賞。經旬住綿城。得此一日爽。回語琴道人。明日再來訪。

金山舖懷祝芷塘侍御時已罷官南歸

屈指瀛洲友。相知獨有君。童顏持漢節。皓首臥江濱。仕宦麒麟楨。詩名虎豹文。綿州分手處。回首惜離羣。

聞孫補山相國重膺簡命節制四川喜而有作四首

黃閣元勳再鎮邊。岷峨歡氣遍閭閻。章阜出塞兵三路。嚴武回朝帥兩川。變理陰陽沾澤溥。節和風雨沐恩偏。老農家住金山下。望見旌旄喜欲顛。

和如霧日肅如秋。百鍊堅剛遠指柔。師誼未忘存趙氏。公房師義烏令趙宏信已沒。惟孤兒在華陽。時加撫恤。君恩深諱伐交州。公征交趾已連破其城。封爵上公。旋因兵敗。鐫爵。有稱公者。皆却之。五銖不待黃牛復。蜀中自乾隆四十三年後。錢多私鑄。以至小錢兼行。商民交病。公奏聞重鑄制錢。銷私錢。其弊始絕。雙轂爭看白鹿輜。如此福星如久借。九重西顧復何憂。

文武才原將相兼。運籌難得是神恬。一車兩僕清如水。萬騎千軍靜若箝。竹馬兒童望風拜。杖藜父老惜霜髯。就中獨有支離叟。感泣私襟涕盡沾。

歸來鷺鷥化鷗鳬。只把烟霞自樂娛。得句每遭人敗興。清狂非是自卑污。愧非徐孺蒙分榻。豈料文翁再剖符。從此漁樵亦安堵。殘山剩水住妻孥。

閩中廣文張景仲芝延英保薦入京路經左綿王汎司文思署席間贈別

吏治聯翩薦廣文。菊花時節又逢君。牛刀初試毋輕割。虎帳雄談幸得聞。南部吏才天下少。東湖詩叟孰爲羣。修門如見諸昆弟。寄語鬚眉白二分。

重過酆都廟有感余舊啓蒙塾也

此是當年舊書塾。童蒙于此課初爻。晨興撥草尋蛇窟。晌晚攀枝探鵲巢。每以收威遭夏楚。偏于覓句解推敲。如今老矣全無用。回憶趨庭淚欲拋。

奉和綿州潘使君詒齋邦和重陽前一日六十初度寄兄四十韻

人生歷寒暑。知着幾花腴。賁諛強名壽。每爲百憂惱。錢鏐七百年。倏爾纔一霎。不如醉劉伶。遣人日荷插。吾綿有賢侯。今年適周甲。四方賣羊酒。維列相排壓。火棗與交梨。瑞氣接莫蕙。而公澹若無。力卻恆若怯。豈曰矯枉哉。此理不待喋。意辭諸賓拜。謬以兩童夾。大廈陳氈氍。避居退寢狹。風雨近重陽。官醞一瓶恰。採菊有東籬。南山高嶠嶠。自酌還自壽。險韻五言押。忽憶鵲鵲原。思之心欲掐。一日如三秋。似歷恆沙劫。白首各天涯。豈忘髫年狎。詩成聊代書。兼問田園業。詞比金石堅。義重載書歎。飛鴻自天至。緘封寄蒼雪。維時木葉下。江波正泮渌。翹首望白雲。不覺岸烏舫。堂前沸笙歌。海錯間紫蜆。公心清如水。長吟口不嚼。噉同翌日乃張筵。小飲但煮鴨。酒酣出奇句。詞源倒三峽。嗟予老更狂。滿鬢茱萸插。逢秋例登高。誰爲接驪洽。一年強在外。偃室未投劄。家居何所營。庭臺種鳥翼。夙仰高山名。龍門並驚硤。欣聞介眉期。齋沐睡不眨。晨興領諸士。城頭聽批鵠。陳蕃榻敢望。乃承孺子乏。知我放蕩人。如猿不喜桺。脫帽舞翩跹。不復拘禮法。公亦起盤桓。解衣時露髀。醒園有興無。萬卷實遜鄴。雖非習家池。頗饒金硯匣。不嫌供給無。尙可搖輕筆。

附

綿州知州潘邦和勅齋吳縣

百年亦須臾。疾如煮羊腴。况復鮮百年。鬼伯儘迫脅。吾豈兒女哉。露晞愁一霎。海屋可添籌。青山可荷鍤。辛亥重陽前。吾年正周甲。僚友及親朋。筐篚相填壓。芳醞傾玉盃。珍筵扇廚蕙。共稱筋力強。誰信精神怯。避席跪自陳。繁辭不嫌喋。家居虎山橋。一徑長松夾。具區三萬頂。規模豈甲狹。探春香雪海。梅花

開恰恰。支硎接天平。翠巘聳岌嶮。明月蕩蘭橈。芳風動簾押。池魚鮮可烹。園蔬嫩堪搯。小飲不立盥。園
基不留劫。一室盈太和。相親戒相狎。歛南拜宗祠。祖籍歙縣。浙西理遺業。商籍浙江仁。和眺覽海與江。
往來若與雪。讀書第一峯。杭城紫陽山頂。有吳山第一峯碑。蘭譜多盟歆。受福占王明。不食虛井渫。伯
兄性瀟灑。烏巾或白恰。獻璞一不收。飄然採石蜩。笑我貪微名。口張不能噲。莊子予口張而不能噲。癸
未憶歌驪。予入川。伯兄送出潯關。乙酉。緬謝鴨。予攝屏山尉。伯兄送眷至。己亥。晤宣城。予由京至寧國。
伯兄泛舟來會。丁未。泝巫峽。是年伯兄至江陽署。兄年適六旬。帽簷花滿插。旋及返家園。末由恣款治。
迢遞斷鱗鴻。慰問疎絨劄。丙午。賦悼亡。血淚沾棺翼。權厝待同歸。柩葬富順西湖之白鱗。鰲孤魂哭寒
硤。哀哉河之鰈。兩目何曾眨。未明卽催衣。不用煩鴨鵝。今吾猶故吾。巴西暫承乏。龜玉詢在櫝。虎咒防
出柙。恐遺隕越差。兢兢守成法。已屆還兵期。古人十六授兵。六十還之。何尙服韎韐。釀王兼黜部。遠勝
侯封鄴。鴈影感秋懷。蟾光悲鏡匣。聽歌鶴南飛。沉吟弄湘篴。

潘使君座上醉呈

五馬今朝座上親。名流不復數安仁。推敲我始逢詩伯。鼯臥君當恕醉人。笑把茱萸頻插鬢。猶嫌竹葉未
濡唇。夜闌踏月方歸去。贏得狂名滿縉紳。

潺亭山下有八十歲老人周士泰家藏明兩銅爵上有成化十八年羅江縣置九字予購得之並紀
以詩羅江今改綿州

人間何處是滄桑。生把他邦換此邦。丁鶴歸來城郭變。兩銅爵上見羅江。

九月二十九日由南村至楊家菴

撲面霜風水漸冰。山翁袖手又重登。烟江有艇聞呼渡。野寺無人但見燈。草上有時走狐兔。空中何日下鵝鷹。池塘十畝頤頻朵。無數龜魚祇缺罾。

久雨忽晴

昨夜三更雨。風聲半在松。今宵一輪月。影挂最高峯。蚊拍手中卷。蟬鳴耳內鐘。明窓紅日上。欲起更成慵。

晚晴

柏葉如楓葉。松聲雜雨聲。隔林千嶂遠。對寺一峯橫。白鷺雪初下。黃花霜倍明。鵲鳩殊好事。向我報新晴。

紅菊

小寺有紅菊。開窓見兩叢。不知過晚節。錯認是春風。欺我顏非少。夸他染費工。未寒何用火。艷艷向人烘。

奉和綿州潘使君訥齋遊醒園枉駕見顧得歸茅屋登萬卷樓原韻四首

好風今日至。秋日本多佳。太守行山縣。吾家在水涯。青苔方鑲徑。紅葉正鋪階。十載踰垣慣。今朝慰夙懷。尋花窮水墅。觀稼上山樓。屏吏獨登嶺。攜僚欲枕流。松間頻坐嘯。竹下忘歸休。自是詩思誤。非關意豫猶。好古有奇癖。登梯無用撓。我猶手未觸。君早日非凡。讀畫匣都啟。抄書板未剗。自從航載至。誰則解披緘。萬卷足今古。千秋獨醉醒。偕君一攜手。頓覺兩忘形。文字前生蠹。功名欲曙星。不嫌書室狹。重對罄餘瓶。

附

潘邦和

琴鶴貽謀遠。雲龍望氣佳。几筵新涕淚。遊釣舊生涯。草色青迷路。苔痕綠上階。高臺瞰四極。秋意澹人懷。已陟萬松嶺。還登萬卷樓。泰山兼土壤。淵海納川流。滴露晨光起。然藜夜未休。古香如可挹。欲去更夷猶。才疎餘短髮。祿薄仗長撓。自信心常逸。人嫌骨本凡。問奇探奧窔。學語仰雕鐫。勿屏門牆外。因風惠一緘。座上客俱醉。園中人獨醒。鷄羣常混迹。魚服欲潛形。潺水升卿月。京門頌福星。主恩不遺舊。名已貯金瓶。

楚館有懷安縣施張兩明府

大安兩賢宰。俱與我綢繆。盡是南方彥。常停北郭騶。政聲比鷹雀。仁術易羊牛。禪榻皆曾館。秋風憶舊遊。觀鬪鶴鶻。

鶴鶻有常匹。飛不越草莽。雖爲田鼠化。性醇易爲養。牙角本相爭。善鬪理或仿。平原豆葉黃。山隴麥田廣。弋人以聲呼。先張以罝網。其或免脫逃。則以鶴輕攘。鬪之城市中。狹斜見必賞。色分紫與黃。像辨鷹與象。每逢羽三稜。其價不計緡。盛之以錦囊。名各牙牌榜。茶滷晨洗臙。紅穀晚飼餉。風和日暖時。刻刻握以掌。

護嗟如護命。引翮兼引吭。如此戰必克。奏凱定不爽。天下果無敵。一博可盈帑。今年金山場。東岳祭用享。梨園演東窓。觀者萬人往。康衢通錦城。豪里多大駟。閒坊成鬧市。紅塵競奔軼。開局尋搭對。勝負賭銖兩。兒童走相報。老興技亦癢。其時雨初晴。夙興披鶴氅。天旣肅以清。地亦更諸壘。翩翩兩少年。各占氍毹上。酒掃剪絨茵。金距一齊放。彊場圍以羅。大小等盆盎。微啄戒飽餐。遺矢徐搔痒。瞿然竦其翼。脩爾搏厥類。鬚鬚怒爭赫。膈膊聲益響。意惡山中狼。氣吞赴壑蟒。三鼓氣不衰。百鬪神愈朗。伺殆倍峻嶒。稍憩加骯髒。非讐如共國。雖勑不釋仗。鑒酣皮屢傷。隅負頭每搶。頃刻雌雄分。毛血流泱泱。喧聲如堵牆。洵然震康嶺。羸者喜揚揚。起取彼豎臧。輸者色悽悽。恨欲首撲碎。會罷復攜歸。仍復露平傲。事後論成敗。聰明盡夸獎。苟無先見智。高談我亦憊。吁嗟此小駕。何足置諸想。俗士達達言。孺子被斯迂。踉蹌忘其疲。空令金錢耗。不有博奕乎。亦與飽食傲。豈無田可耕。豈無絲可紡。梓匠有輪輿。商估有船輶。縱恐不讀書。何至飢拾橡。捉衿見肘日。曷以見親黨。書此以規世。或可醒昏罔。不變而之善。祇堪以蓼釀。

讀岳忠武傳三十絕句

萬古功臣萬古冤。精忠報國背堪捫。至今獄案無他語。天日昭昭八字存。中原百戰恨難平。只道君王自罷兵。十二金牌魂魄冷。方知長脚誤蒼生。柑皮爪畫精忠命。小紙書殲大將身。當日臨安菜園上。荒墳猶諱賈宜人。中原腸斷請仙詩。英氣長存九曲祠。莫向臯亭山下過。伯顏曾祭岳家旗。

弱冠操椎八十斤。軍中都號贏官人。可憐百戰名俱一。到死功勞未上申。
一鼓能擒郝白巾。閭中觀察閭中人。岳家愛將無辜甚。銜口如今祀烈神。
一家忠孝姓名香。高祚安孃已表揚。獨有鐵崖新樂府。銀鉗怨裏訴興亡。
家存御筆煥天章。拘沒都還內庫藏。怨鶴故巢猶在否。江州原是舊家鄉。
中興立誓作功臣。刺繡爲袍字尙新。獨有斬王心最苦。題詩常憶翠微人。
西湖之畔北山湄。異日朝廷必購屍。棘勒寺中遺屬在。果然隗順是奇兒。
眼分大小識先皇。變馭初歸自朔方。恨殺岳將軍不見。深宮從此道家裝。
哭聲如震籲天求。到底公心萬代留。一自鄂王謚忠武。岳州不復改純州。
張韓劉岳四名將。南渡功名共頡頏。誰料是非千載定。鐵人添鑄鐵山張。
奸桎及妻王氏。万侯高像跪西湖墓前。萬曆間。兵備道范淶增張俊像。俊一作王
俊。按張俊。人稱鐵山張。

岳之事張力爲多。後撫臣王汝訓。沉張俊王氏于河。今復鑄如初。

金會議定遣秦歸。聞死方知莫毒予。當日壽皇知也未。又來洪皓蠟丸書。
一腔忠憤性生成。議論剛方必力爭。自跋御書曹操後。殺身禍已此時萌。
大臣面諷有誰知。至德無師主善師。痛飲黃龍成恨事。暗中兀兀早書遺。
廉頗雖死凜猶生。諸葛曾書善用兵。望斷撼山軍不至。兩河父老盡吞聲。

靈旗鐵馬尙嘶風。宮殿栖霞落照中。誰把賀蘭山踏破。空教淚洒滿江紅。
當時兀朮已收兵。號令燕南盡不行。內有權臣身不免。先知叩馬是書生。
忠似汾陽偏有福。冤如道濟更兼才。孤臣尙有藏埋骨。五國遊魂盡作灰。
北人奸細南佳士。要算心忠兩國間。南自南來北自北。徽欽從此不生還。
殺監乘舟底用猜。記程航海豈能來。薦賢却笑胡安國。直破羣疑有李回。
長舌從來是厲階。誰知陰險善安排。但經沖正先生口。毒過中丞肉簡牌。
讞誣只在棄山陽。逗遛淮西計亦良。莫怪小人多反覆。平章依樣害平章。
皇天后土此心知。指斥乘輿豈有之。告計兩王俱反噬。至今只罵皂雕兒。
秦頭太重日無光。錯摺頭巾聖相裝。獨坐中書書剝字。申王真似剝皮王。
一經共贊能教子。五世方知斬已遲。王氏子爲秦氏後。誰言天道竟無知。
造諸惡孽似蟲蠅。豈果前身雁宕僧。五十三人如不病。魏公大獄又當興。
殿司小校亦微員。刺客從教白挺懸。舉世盡無忠義氣。男兒畢竟讓施全。
靈隱留題地藏詩。權姦未死已魂褫。鐵枷獄比風波險。傳語東窓悔已遲。

金山雜詩三首

森森無患木陰稠。東岳行祠在上頭。土竈然箕箕又滅。刪詩惟借佛燈油。

入夜何須秉燭遊。天街自有月光留。人聲已靜雞聲起。誰對疎燈話酒樓。
緣橦升木似猿扳。直上刀梯若等閒。愁到連年愁不得。割愁幸遇劍鉞山。

送補山相國至西藏二首

羽書飛電馬飛雲。知有番僧進表文。聖主只今無量佛。何須達賴請三軍。
相國威名再鎮川。也隨竹馬拜轎前。道旁執手霜髯戟。想見愁眉火欲然。
綿州爲西藏必經之路。就近迎迓。蒙重問家况。而須髮較三年前斑白矣。

贈馮鈴轄

斬草除根易。爲民去暴難。萑符千里盡。鉦鼓萬家安。曹法常懸棒。秦旗恐卓竿。
將才君定可。誰與薦當官。

行李歌

我馬旣瘡。行李累矣。從者皆病。腹告匱矣。日暮叩門。虜也吠矣。張燈圍爐。
寒色退矣。嘉肴脾劇。肉食媿矣。有酒如澠。客旣醉矣。主人且去。吾欲睡矣。

唐園見菊花

剖面寒風似剪裁。羔裘擁鼻覓花來。蜀中節候無他異。黃菊多於十月開。

臨安太守張蔭堂玉樹以書求函海却寄

有客潺亭暫解鞍。新從膠牧守臨安。隼輿枉駕偏相左。始信人生見面難。

聞道官清水一潭。獨于典籍有奇貪。吾家函海貪尤甚。萬里長須達遠函。
誰似才人康德涵。武功縣志早沉酣。他年如續龍門史。補入張堪作美談。
碧玉峯頭霜雪中。山茶如火笑春風。倘逢驛使錦江過。先寄滇南鶴頂紅。

喜什邡甯湘維明府枉駕見過分韻牌集詩二首

聞客來蓬徑。呼兒正葛巾。僊蹤過北郭。謳詠動南鄰。地以名賢重。天開老眼新。
幽居垂訪問。危坐話寒筠。村僻本孤寂。胡然車馬馳。流觴學飛羽。集句當敲碁。
人擁柴門看。家慚出饌遲。山林來好客。鹿豕女休隨。

除夕

少喜流年增。老懼流年去。流年仍率常。喜懼各分慮。偶見塵埃掃。又驚日月除。
屠蘇名雖佳。分明老堪惡。桃符何必換。轉眼門閤故。今年稍光輝。刺史蒸豚賻。
安州曹汎司。亦有香麝賂。藉此潤筆資。供我口頭饅。自斟復自止。病齒每搯箸。
坐令山妻憎。負此賢內助。

童山詩集卷三十一

壬子

元旦三首

昨夜歲仍舊。今晨歲忽新。同此一夜中。已分兩年人。人老添是減。人少縮是伸。老怯筋骨禮。不敢出迎賓。少夸脚力强。走遍東西鄰。不如且高臥。庶免客生噴。待其酒食去。然後起着巾。晨鐘發深省。默數平生因。天既生吾身。必有吾身事。就身所應爲。暗必合天意。寡過時內悔。知非尙無愧。究竟不知天。置我身何地。譬如產木材。雕斲爲人器。芒刃用既鈍。豈免投閒置。蛛網與塵封。不復珍篋笥。變化亦有時。數惟管輅識。我歸今八年。成功甘早退。山林歲月寬。尙可任恣肆。優游養性天。聊以守素位。以云身衰耗。須髮尙青翠。以云身剛強。行必藤杖佳。似弱又似強。不知天所畀。旺羸與盛壯。我聞有元氣。金丹誑愚兒。往往翻受累。神仙吾不爲。期願由自至。誓此以自賀。詩成身已醉。

初一日南村觀捕魚

聞呼溝上捕魚來。要算新年魚一災。破袴脫時持簞去。拈鬪賣罷得錢回。西疇田父爭春水。南圃園丁報早梅。惟有老人局室坐。天寒自撥不燃灰。

小西湖初成井序

余在通罷官。每日思歸。遂見之夢。夢中輒見南村屋左。有荷池。池中樓臺掩映。醒問自川來者。皆以爲田。然不夢則已。夢則如是。余必度曰。得勿使化田爲湖。後半生居於是乎。果爾。得歸當成吾志。自是不夢。今名小西湖。遂初志也。

內鑿方塘外鑿堤。一朝鑿破夢中迷。不栽便有菰蒲長。纔種旋看竹樹齊。十畝肥饒化魚鼈。百年浮沒任鳬鷺。更移紅白新繁藕。要當西湖在屋西。

十二月立春雪

不是草萌動。春來人不知。小梅纔破口。弱柳未成眉。官有土牛送。鄰無金燕遺。雪知時節暖。墮地故遲遲。

元宵

元宵爭看採蓮船。寶馬香車拾墜鈿。風雨夜深人盡散。孤燈猶喚賣糖圓。

春望

十日陰寒懶出遊。偶來平野豁雙眸。喜晴楊柳舒青眼。妬雪梅花笑白頭。隔樹一鳩啼午寂。並巢雙燕訴春愁。誰家牆外花枝好。破費黃封一日留。

龍骨車卽漢書翻車也

歷歷錄錄車翻轂。汨汨沒沒水出腹。渾如木龍露骨筋。昂首噴珠傾萬斛。恍疑白日龍戰野。其血元黃走

平陸。又疑黃帝禦蚩尤。驚散魑魅鳴獨角。呼日吸月三十輪。旋乾轉坤百千軸。坐令滄海變桑田。頓教蘊隆飛震霖。農人告我春已至。西疇苦乾無滲漉。陂池積有雷公水。犀斗無功棹力弱。惟有腳車實如龍。輻片鱗鱗收效速。清曉肩車向平陸。四人迸踏雙轆轤。水滿耕犁覆以杷。灌溉陡覺成膏沃。激泉可使躍過類。踰溝可遣遍深谷。二月三月蹴蹋勤。高原低原稻穀熟。翻翻蛙坑長科蚪。澾澾牛涔生水族。每逢天旱人忙時。柳陰赤足袒衣服。我聞此言喜加額。斂袖旁觀親擊目。常疑人巧奪天工。始信冬官多闕牘。雲雨只須舉足勞。獨兩手能翻覆。吁嗟假龍尙如此。真龍懲霖罪何贖。

過德陽縣有感縣令王學濂先君丙子門生余癸未同門也先君檄歸咫尺不弔詩以刺之

十年閉戶守蝸廬。長爲離羣歎索居。莫怪宦情如水淡。門生也寄絕交書。登庸衣鉢亦相傳。盛事今夸縣令賢。絳帳未遙空總帳。後堂不復到彭宣。禮闈曾伴赴瓊林。況是通家世澤深。記得孫公園唱和。金魚分贈結同心。

錢塘師誼道尤尊。前有袁枚後有孫。袁子才有寄座師鄂遜齋詩云。乃知師恩厚。還在父母前。孫補山總制全蜀。其房師趙宏信已故。未到任。卽登堂拜母。重卹其孤。不近人情。今再見。只須痛讀辨姦論。

紅牌樓

山色溪光處處迷。新鶯喚我過橋西。柳經霜後綠初染。草帶燒痕青未齊。烟簇紅樓堪繫馬。日斜白屋欲啼雞。誰家鼓吹爭迎客。環堵摩肩擁衆擠。

有爲其親死而求題木主者作詩自嘲

幽居種樹愜幽情。苦被東風勸出行。人自狎時吾自敬。主方哀後我方榮。聊防竹下關門嘯。只少花間喝道聲。猛記髯蘇詩大噱。官衙只好寫銘旌。

雲菴送梅

不知誰主與誰賓。聞有梅家便駕輪。老眼看花真似霧。枯身如樹又逢春。水邊萬點望無際。竹外一枝斜有神。林下美人如許聘。要同和靖議婚姻。

二月初一日安縣張鄉圃

仲芳

綿竹裕容齋德兩明府聯車過訪云州尊翌日卽至

聞報兩旌至。柴扉淨掃埃。雙鳬自天降。五馬幾時來。林鳥知官噪。蘭花爲客開。容齋狂興在。作客亦攜醅。
裕明府自帶綿竹大麴酒。

再至睢水關

地入天台數往還。惜無飛脚試孱顏。時平早撤黃花戍。日久猶聞白草蠻。割漆山翁腰黑桶。鑄爐炭客負黃錢。年來漸覺南山盡。斬伐還愁造物慳。隔江亦有天台山。

紅梅四首爲李雲菴題

月邊原嬈娜。雪裏倍精神。只爲無人愛。胭脂略點唇。
冷翠蔦紅日。擔風握月時。不因香透骨。錯認小桃枝。

深宮憶壽陽。倚媚臥含章。點額人何處。居然五出妝。
自是美人種。臨風倍覺嬌。倚闌羞不語。但見頰微潮。

擔炭行

路入睢水關。巘岨通一線。詰曲遇來人。背挑無非炭。斑白亦負戴。單衣纔至胷。任重杖乃興。決髓皆流汗。
滿面烟火色。十指黑如澱。問翁炭何爲。答言衣食街。關內有黃敝。記里三舍半。山高多杼櫟。伐薪利用煨。
其地鮮稻稭。斗粟百斤換。炭賈復易錢。錢復易米糲。以此老筋骨。頤口復顧脊。豈無高岸坑。屢躓脛輒斷。
豈無蛇虎傷。見則奉頭竄。隆冬雪霜天。努力尤不倦。豈不畏饑寒。但憂炭直賤。去年成都府。錢小不堪貫。
私鑄塞其間。甚爲民不便。大吏聞常寧。行文各州縣。盡繳青蝦蟆。洪爐重鼓煽。開局摩訶池。催炭急于箭。
睢水炭所出。奉令孰敢讓。老少俱供役。牽挽走山棧。十日一往還。得鍛市一串。燒木罄南山。尙不輸鎔鍊。
公鑄私又撓。新錢舊復揀。今年府東南。民好又改變。只用辦子錢。一槩斥爲賸。官禁抗不從。那復懼鼎鑊。
漸至錢不行。貿易只米麪。以此代憂天。常抱杞人患。斑白何足惜。疲癯亦已慣。今年復來年。聊借炭爲餐。
但使不擇錢。溝壑填不怨。

從什邡甯明府湘維乞西湖紅藕移栽

去年曾記謁琴堂。繞邑荷花十里香。無數行魚聚圓葉。有時睡鴨蔭垂楊。主人蘊藉山平遠。客子浮沉水渺茫。
豈料歸來臥邱壑。高軒重枉過茅莊。

破費溪西十畝田。鑿池引溜漸成淵。人言書塾宜栽杏。我愛方塘雅配蓮。惜少凌波妃子襪。難稱貫月米家船。西湖佳藕如容覓。記取紅粧萬朵妍。

送朱樸園德琮歸宛陵

我方與君遇。君又舍余回。酒渴因慚李。詩窮不讓梅。謂李太白梅聖俞。皖山從此去。潺水幾時來。倘憶南村老。卿嬾試一開。君攜余所輯函海回南

九華山和九臯韻

地湧大華岳。天生小劍關。雲巖垂細髮。風磴裊頽鬟。樵叟恍雲際。僊廬忽澗灣。渾忘東海遠。只在袖中間。醒園桃李盛開節。潘訥齋牧伯偕蔣參軍同賞。

頻年踪跡似踰垣。老病逢春只避喧。誰使蓬蒿開竹徑。頓將桃李比芳園。鄉風共試鄆筒酒。往日空遊下澤轅。更有海棠開爛熳。題詞應續石湖言。范成大詞只爲海棠也合來西蜀

小屋西邊偶鑿池。水栽蓮莢岸栽楨。欣聞太守停驂馬。頓使山人倒接籬。魚躍晴波知逐客。鳥拳風葉聽吟詩。他年若個茅亭子。勸稼來時好挂額。

附

富順令署綿州知州潘邦和訥齋吳縣人

文光上徹紫微垣。調進清平早息喧。爲問軟紅馳北闕。何如濃綠集西園。詩箋寄與龍吟水。宦況驚心駒在轅。君已迴輿儂叱馭。相看一笑不須言。

欲借清陰蔭小池。益州方物木稱檀。風流座後饒絲竹。疎野人前著接羅。久仰羣公能作賦。何緣俗吏勉題詩。不堪草舍多繩縛。五鳳樓題妙解頤。

寒食姜詩墓觀賽

姜公邱壠絕樵蘇。寒食千家挈酒壺。百道露泉猶躍鯉。萬年宰木尙啼烏。赤眉當日防驚孝。黔首今朝共賽巫。同是陳人偏血食。幾多村墓紙錢無。

玫瑰

深紅藏宿雨。紫艷愛烘陽。色裏應無比。花中別有香。竹肴堪餉客。孤命恨離娘。最是天生潔。偏宜近玉堂。

仙女洞在德陽縣北四十里

橫江鐵壁垂。水溜滴成洞。天工巧煅鍊。琢石爲屋棟。聞昔有獵夫。搜山失其衆。忽遇兩神女。採藥相戲弄。便從後尾之。徐退恐稍縱。翩躚轉山曲。投身入石縫。雙鑲門自關。叩戶撼不動。但聞搗臼聲。隱隱如鳴甕。恍若出天台。不邀仙子送。此語傳人間。恨較劉阮痛。至今洞已開。仙跡渺難供。空餘鍾乳流。不知作何用。惟見兩石人。馳馬猶銜韉。我來訪靈蹟。撫事一增慟。駐顏少金丹。誰賜蟠桃種。掉背猶相失。後來況敢夢。惟應每歲來。花開聽鳥啼。

題黃生士璫迎旭軒壬申進士乃祖景書塾時門前新橋初成

門生有幽宅。信步到江邊。全當躡橋過。非徒趁酒筵。蜂喧停午日。鳩喚欲晴天。不速君休笑。君翁我所賢。

題金堂尉姚古愚松下獨坐圖

科頭松下者爲誰。錢塘老友官晉熙。中年驥足苦不展。坐令霜雪盈須眉。我昔紫巖訪賢吏。盡道士元日日醉。豈知積案咄嗟清。百斗猶能書細字。歸來作詩寄岑溪。蜀中仙尉無與齊。平生愛客囊如洗。晨炊往往聞饑啼。竭來金水重相見。握手挑燈促開燕。酒酣捧出秋興圖。要我揮毫書素練。自言仕宦似鮎竿。秋風夜夜驚張翰。昨宵一覺迴鄉國。猶夢江頭飽食鰻。古愚常言杭州鰻魚之美此意請君且休矣。巫峽吳山隔雲水。但教筋力老益強。何妨相思日千里。

金堂訪禮曹高白雲先生故居見嗣君兆魯留贈

平生師誼最關情。絳帳重過記錦城。雀入講堂悲伯起。草生書帶憶康成。春風坐冷人稀到。夜雪門荒我獨行。尚有傳家詩禮在。趨庭故步早來迎。

題雲峯雨窗夜話圖

春雨簾纖春晝長。修竹吾廬花木芳。主人留客焚清香。廣羅古畫開縹緗。中有一軸新裝潢。迺是雲峯山人莊。雨窗夜話書左方。展讀憂憂風生涼。梧陰籠院遮燭光。芭蕉滴瀝聲抑揚。中有三人共一房。小酌隨意雜酒漿。不知抵掌何洋洋。大半高論皆羲皇。上有款做董其昌。乙巳五月留蘇閬。二客李生四明狂。落筆者誰近元章。長洲陳栻題其旁。迄今又閱八年霜。昔在平江今金堂。細雨亦復同淋浪。坐客換我與陳省齋張。建中乃知聚會真難常。一別便同參與商。前後等視俱黃梁。況我鬢髮尤老蒼。能不披圖生激昂。

觀君一舉醉百觴。隨我歌舞聽絲簧。醉卽大笑僊千場。免致各天空思量。安知不有畫手強。又圖今日雨聯牀。

答何雲峯

竹林喜共阿戎語。聞道雞林問雨村。漫把詩名傳海外。爲言寂寞老柴門。雲峯自京師言朝鮮正副使者入貢俱能背誦予詩并問余消息。

金堂署觀劇

雲頂召予已遍遊。行勝何意又攀留。虛名每愧陳蕃榻。佳句誰傳李白樓。禍福無憑皆自召。功名有定只看優。若將我輩登場演。粉面何人可與侔。

得魏宛卿書二首

魏王船上客。久別自燕京。忽得錦官信。來從繡水城。謳推王豹善。曲著野狐名。聲價當年貴。千金字不輕。傳粉何平叔。施朱張六郎。一生花底活。三日坐中香。假髻雲霞膩。纏頭金玉相。燕蘭誰作譜。名獨殿羣芳。時都下傳燕蘭小譜。載樂工數十人。以長生爲殿。長生卽魏宛卿小名也。或云小譜余秋室作。

寄金堂右尉署不寐

一生富貴沐猴冠。待得歸鄉興已闌。底事官衙偏不寐。從來野性慣林巒。

病中和四壻張玉溪懷淮劍雲亭二首

最是夏初好。偏逢病裏過。山高看月小。亭敞受風多。拄杖數新竹。臨池摘小荷。數旬兼止酒。那許便高歌。年衰難買健。時過假稱高。日月雙芒屨。乾坤一敝袍。摩碑思補史。諳藥解箋騷。贏得妻兒笑。胡爲不憚勞。

眼鏡與玉溪同作

眼昏無治法。得鏡忽雙清。全洗看花霧。偏添小楷明。玻璃鑲去薄。鑲帶帶來輕。愛爾從予久。新加老友名。

附

張懷湛

明眼時愁暈。奇文倩鏡收。中分雙匣水。共此兩輪秋。怪道波初淨。何堪石乍投。睡餘拋卷後。雪影枕間浮。

鷹瞥崖

何年一隻鷹。垂天下雲翅。竦然不受譴。撲穎如裂眚。一旦化爲崖。猶見鷹瞥利。其立若愁胡。其貪如伺餌。狐兔未秋肥。問何側目視。毋乃鼠竊多。職掌失其位。我來有追逐。正坐少趨驚。安得借蒼隼。爲我一縱臂。吁嗟速歸來。人鷹正滿地。

頂雲觀

頂雲何其高。孤絕出雲杪。四面寡崕嶺。竟如姑射藐。髣髴盤上天。天風吹飄渺。獨立何僊僊。愈高愈窈窕。五丁不到處。一觀峯尖小。人言公輸般。刻薦假神道。我疑阿育主。同塔遣鬼造。何地不生人。何人不生巧。矛頭亦能炊。天亦故相翽。又恐高無泉。坐令道人殍。分與一天盆。使以寬儲沼。獨留續香烟。不許旁人飽。

欲上無天梯。何處問瑤島。微聞山中人。採藥曾至嶺。

聖燈山

聖燈果有無。我聞心恍惚。及至大安山。細徑杳如髮。十里迺至頂。扳擠費顛蹶。下看若無地。上視乃平闊。樹木帶危亭。飛泉挂崖窟。每逢月上已。拜香走勃窣。男女肩相摩。觀燈候日沒。臨岩人初靜。乍見一燈發。初如螢低昂。漸見火倏忽。須臾千萬點。照遍各林樾。有客向余指。禪榻尚可歇。誠哉有此奇。便欲從結轡。但恐未傳燈。此行終勃勃。

草鞋街得僕

四山風雨撲人來。不見櫺青矢不迴。踏破鐵鞋無覓處。不知却在草鞋街。

訪吳隱居

草石河邊市。來回已再經。竹圍村寺綠。山對店門青。楊柳三叉路。橋梁兩岸亭。更尋吳隱士。買藥一瓷瓶。楊峙西得子。求名於余。命曰玉麟。並綴以詩。

山中夜行

信是寧馨物。他年柱石材。如松千丈幹。似桂一枝栽。釋氏曾親抱。張仙自挾來。玉麟名不愧。試看首先回。黃昏村徑黑。得火乃前途。明月見而隱。稀星有若無。兩邊疑陷阱。一路總模糊。夙凜垂堂戒。胡爲至此乎。

宿龍藏寺

小寺纔容膝。禪床暫挂單。楚咻厭莊獄。魯酒困邯鄲。露下人移坐。風喧鳥未安。更無龍藏度。繡卷惜經殘。
半邊街

迤邐不知路。坡陀盡草萊。數家臨水住。一店背山開。簷引葡萄上。窗迎籠竹來。能容鼾睡否。拚醉主人杯。
沸水泉

久聞沸水名。未識沸水面。問壩到三堆。始詫源一線。初如湯正熱。釜底薪煨煉。又若煮井鹽。熬素雪花煎。
竊疑癡龍伏。吐咳珠璣散。又疑魚濡沫。鱗尾驚撇漩。泯泯滋爲渠。混混汪若淀。四時科必盈。五色石交炫。
綠淨唾不能。清寒嗽隨嚙。遠過趵突泉。近壓神泉縣。下流趨成江。分派開作堰。楊柳插蔭翳。葭荻互葱蒨。
殆可溉千疇。豈止供百輶。上有小蘭若。不知何年繕。遷喬剩遺基。草創止荒殿。山高神必靈。人禱霖屢驗。
以此屆年豐。賽會交祭薦。吁嗟此醴泉。擇地何不善。平陸倘皆沃。天下沾可徧。盍爲墮一隅。只私山民便。
鞭縮諒不能。袖手空健羨。

青雲山

青雲無丹梯。平步上霄漢。木末懸飛甍。乃在天之半。上有奎星閣。光射斗牛貫。父老爲予言。文章實未煥。
以此新劇錢。創業出里閭。僻陋在山陬。未遇名筆贊。今幸得主人。倘藉翰林翰。予聞始愧赧。仰首忽生歎。
昔忝中書堂。曾侍玉皇案。鳳凰不如我。炫采比鵬鵬。自從毛羽摧。襁褓草中竄。局踣林莽中。尙敢以文銜。
漫賦青雲詩。只作青山看。

避炎

避炎如避寇。逐北盡投林。總似火牛逐。思同水鳥沉。倮妨松下臥。詩稱竹間吟。正好荷開日。困園樹樹陰。

六月六日題西昌楚館壁

禪房深映竹。幽徑曲栽花。粉蝶牆陰聚。鳴蜩柳葉遮。雲濃知欲雨。夕照忽橫霞。雖在繁華地。心清却厭譁。

番麥俗名御麥

山田番麥熟。六月挂紅絨。皮裹層層筍。苞纏面面櫻。兒饑燒作果。郭嘔釀成筒。此日嘗新始。貪饒笑蠢翁。

過台子山視女時壻赴州

又飽少口食。無慚袁隗妻。斫芻因餵馬。爲黍不留雞。白屋新經盜。青氈亦盡攜。可憐季長女。掩面室中啼。

戲作催粧詞四首爲已故某令妾田氏私嫁作氏揚州人

落月窺窗燭淚紅。飛花入戶怨牀空。誰騎白馬臨門迓。速捲衾裯趁晚風。揚州生長慣烟花。回憶平山是妾家。燕子樓空誰耐得。可憐人已抱琵琶。聞道東施善效顰。幾回欲問礙情親。明朝再訪天台路。洞口桃花已屬人。金屋阿嬌夢一場。羅幃昨夜又鴛鴦。世間別有鍾情者。篋內癡藏半背香。

江漲

江漲奔千馬。山高隔九龍。已驚橋盡漫。又報路全衝。雲陣連天壓。風濤入夜洶。何時羶盡掃。穩杖一枝筇。

潘訥齋過壽佛宮見訪

忽報高軒至。相逢野寺談。睡餘方媿拾。余所著有睡餘新拾十卷。亟蒙見賞。吟藁復商參。酷暑去諸吏。清風生小菴。不須臨水坐。相對若沉潭。

其狂真柳絮。不遣悔楊枝。自笑吾衰也。當同君戒之。標梅歌適願。芍藥賦將離。安得人間婦。齊低舉案眉。指田氏事。

小西湖新種蓮花盛開簡甯湘維二首

春時初種夏全敷。早見亭亭不染污。雨濯紅粧如乍浴。風翻翠蓋欲平鋪。牡丹比貌姿差遜。梔子同心味豈殊。藕是西湖移得至。稱名合喚小西湖。昨朝薌圃什邡迴。爲說環城菡萏開。苦少佳吟偕汝和。尙遲尊酒望余來。放生魚鼈多希雨。破浪蛟龍豈待雷。後會何時期再約。只愁座又缺鄒枚。

小西湖看荷

誰開玉鏡瀉天光。占斷人間六月涼。長羨鴛鴦清到底。一生受用藕花香。

安縣張薌圃明府將之西藏從軍杆駕見過送別四首

敗意偏當得意時。茫茫天意竟難知。人言失馬寧非福。我謂亡羊補未遲。暫蹶霜蹄行外坂。終看雲翼振天池。相逢握手還相笑。贏得軍功竹帛垂。

聞道終童欲請纓。攀轅父老淚縱橫。信知王粲從軍樂。却怨仇香出塞行。錯節盤根新利器。繭絲保障舊官聲。就中獨有支離叟。無限臨歧送別情。

家近安綿接壤鄉。每逢花酒詣琴堂。時因拜母留旬日。暗爲殤兒泣數行。回憶板輿誰代奉。每憐嗣續向朋商。此行只當勤王事。漫向高岡賦不遑。

甲冑何須必自擐。從來忠信革奸頑。三年重踏烏斯藏。君曾籌餉西藏三年。十載全清白草蠻。安縣爲前明白草蠻出入之所。君前後蒞任十年。而邊患又安。虞詡豈知能武略。劉琳原只列文班。天留露布遲君草。倚馬飛看奏凱還。

偕曹玉田柴豹文楊峙西至吳村餞送張薌圃之西藏回輿過靈印石席地再飲薄暮乃歸

安州山水窟。一一雲峯屯。其中最幽秀。第一曰吳村。初入路頗狹。髣髴逢桃源。山近得小口。亂石疊爲門。門通來往衢。磊砢左右蹲。高者敞夏屋。低者羅瓶盆。大者如牛馬。細者如兒孫。中橫一巨石。劈破不可捫。聞昔有月堂。留此靈印痕。至今稱鬼打。母乃鄙俗言。矗立負江游。峻嶒攢山根。地本饒水竹。竹茂復成園。赤日照不到。幽禽相啾喧。時維六月望。張君之西番。同人共追餞。回車畏炎暄。曹子有雅懷。謂此可避煩。顧視攜櫺中。尚有餘髮殮。解鞍就石坐。愛其樹陰繁。不復相揖讓。竟各恣啖吞。其時天無風。但見羽扇翻。野味雜豆菽。沽酒添鬢鱗。自謂羲皇人。尙留吾輩存。何異秦一子。訪道登崑崙。坐久山風來。疑是雨聲誼。命駕各歸去。日色趨黃昏。老興此不淺。作詩志勿諼。

安縣少尉顧雨菴置酒城西樓招余及柴豹文曹玉田楊峙西同登觀繞郭諸山欣然作歌

顧公當代風雅無與儔。置酒安州城西之高樓。繞郭諸山次第出。一一送入吾曹眸。浮屠拱其南。聖燈峙其北。犀牛喘月一回頭。鷹背凌風雙竦翼。就中一峯插天半。飄渺虛懸頂雲觀。昔年飛仙曾一登。撞落星辰倒河漢。東有奎星之閣。西有翼泉之亭。亭臨渡口列几案。石堆江背雜障屏。水鱗鱗兮山嶺嶺。開筵適當西山缺。酒酣起舞風滿樓。不知何處有炎熱。坐中客有桓伊者。三弄笛聲歌九夏。吾謂山水有清音。何必絲竹紛紛也。夕陽欲下衣袖濕。諸人猶在城頭立。笑謂吾曹速排詩。三百年來無此集。

鐵牛頭

何年黑牡丹。泥深四蹄重。力瘁筋力疲。牧兒亦侮弄。一夕化爲石。如鐵鞭不動。我從浮山來。竟就鐵牛鞍。馬競蹀躞行。牛負穀觶恐。勸君勿驚牛。此物曾充貢。挽石爲柱礙。運木作梁棟。曾荷天闌養。半分乘田俸。一自放歸山。棄置永不用。昔日陪鴛鴦。今日伴翁仲。牛兮汝應知。辜負王恩重。

小魚洞

四里坡而下。有洞泉淙淙。轉腹細若螾。出口奔如龍。懸崖崑崙處。噴薄濺蒼茸。散爲百斛珠。如米跳自春。坐令魚誤餌。遂隊爭噉喙。諒無額可點。徒與乖供饗。我欲批其鱗。窟深不可蹤。恐觸養饗怒。歎息姑爾容。

黃楊坪

石性本至剛。水見不敢遭。水性本至弱。石見不肯饒。我過黃楊坪。澗闊不容刀。秋漲來觸之。且過且哀號。

始知橫逆人終爲柔所撓。轉瞬石盡出。水已萬里逃。慎哉毋狎水。作詩示汝曹。

觀音閣

江小灘益號。山轉路愈隘。但見石鑿鑿。不見雲靄靄。神工解濟人。佛法本無界。中有觀音閣。上倚石爲蓋。慈航果有無。隨緣斂頭會。何以紫竹林。不聞香薺馥。往來皆茶商。我乃無一貝。笑謂千金子。有鍔暫稱貸。石嶺

江忽別山去。嶺乃截江橫。人如蚯蚓上。路作蜿蜒行。我乘小籃輿。仰天上崢嶸。衆力扶之前。乃反向後傾。櫛櫛十人抱。檜栝千年生。新翠變黃壤。濃綠抽紫莖。麤麤得所養。麤麤時有聲。到頂天一握。始覺雲四平。劃出南北界。諸峯面畢呈。隱約山缺處。人烟見茶坪。天爲珍此草。設險護勾萌。下山復見江。又與江同程。小河

巉巖盡處一溪清。便放肩輿步問程。茅屋忽從崖裏出。板橋多在水中橫。兒攀紅穗偷番麥。客斷青鞋續草莖。不爲看山安至此。大夫誰道不徒行。

茶坪

千崖歷盡見平坡。土俗山田不插禾。春雨足時茶戶喜。夏雲深處酒家多。天寒六月無蚊嘅。地僻前山有虎過。路近蠻荒碑版少。鐵牌雙柏日摩挲。

鐵牌雙柏行并序

雙柏在茶坪後山張氏塋頭圍可五十抱。各剝樹臍釘鐵牌一面。爲明萬歷年間造。蓋護樹願碑也。銘似咀咒文亦鄙俗。左牌如故。右鐵牌爲柏皮包吞入腹中。留尺許一縫。尙有二三行字可辨。文亦同左。蓋一鑄二牌也。此地明以前爲白草青片出入之所。故別無文字碑版。盛朝開闢山陬海澨。凡有血氣莫不尊親數典而至明亦不啻上溯鴻荒也。

雙柏屹立哉。何蔚蔚鬱鬱而蕭穆。圍可五人之抱兮。高可十畝之陰。中懸鐵牌牌各二。乃是咒咀護樹之銘箴。其文近釋其字俚。不足摹倣不足臨。薄如皮半穿蝕扣之但聞錚錚音。其一完全不復損。其一半爲樹蝕侵。嗚呼古人畏咒咀。尙可以牌禁。今人有咒亦不畏。故目中柏無成林。

入山

入山恐不深。更入茶山坪。父老知我至。招呼相逢迎。彼此邀還家。以我爲人情。丸煤與葦管。塗抹徒縱橫。草書不入格。今復龍蛇驚。何以爲潤筆。村醪濁復清。烹雞冠爪具。蒸豚椒薑并。醉中復何言。無非讀與耕。我爲父老歌。作息荷昇平。父老亦不解。能雙目瞪。

題弟惕齋烟波垂釣圖

何處山光如此碧。花如茵。縹草如席。巖阿柳陰釣者誰。科頭白眼踞盤石。余弟惕齋向余言。此卽吾家魚田宅。繞宅雲峯皆嵯峨。下俯清波爲鴨河。神仙已去赤鯉在。至今遺得紅鱗多。黔南地本居幽隩。春來常傍西巖宿。山童安竈斫銀絲。仰天獨酌家糟麴。醉倒長歌無人知。惟有黃鸝和深谷。一自看山到峨眉。十

載油幕。殢巴蜀。夢中忽憶故鄉鱸。醒來滿眼仍文牘。寫作烟波垂釣圖。欲遣余懷時展幅。知君高臥樂林泉。可許餘風共追逐。聞君此語爲悠然。我亦初歸負郭田。觀君此畫高君志。何幸方亭共看蓮。蓮葉雖已倒。蓮花開尙好。煩君豪飲累千觴。看我筆陣橫空掃。掃却君眉萬斛愁。插架書同李鄴侯。况遇賢主老賓客。酬唱詩牌與酒籌。蓼花蘆荻紛如織。秋來水寫瀟湘色。但教有蓮共吟哦。何必苦思山水國。

武進縣令譚敷五經余甲午科粵東所取士也奉檄運餉至蜀壬子中秋後二日道出綿城枉駕見過詩以志別

譚君原是粵中賢。倏忽離居二十年。自分半生從范蠡。何期萬里到彭宣。餉來川北時何速。官到江南歲易遷。臨去師生無別語。歸吳早寄老夫牋。

十二月初六日爲湘維誕辰以國忌改初八余攜樂至什邡補祝是日湘維納姬將至而長君親迎亦到。

屢奉簡書催不到。今朝攜樂自還來。病思花縣人俱遠。壽補桃尊議並開。歌管繞梁青鳥至。結綯迎輦白駒回。樂天老去風情在。尙爲楊枝轉屬媒。

十二月二十八日荷花池紅梅書屋落成是日移居自賀

也有亭臺也有船。出門數步卽平泉。愛香每向梅邊住。習靜常從竹裏眠。新屋攜兒同襖被。坐床少客亦鋪氈。堂成吉日無人慶。自寫新詩當賀箋。

童山詩集卷三十二

癸丑

癸丑元旦

今歲初交六十春。居然忝作杖鄉人。屢經磨蝎仍無恙。亂草靈符尙有神。膳飲從遊隨日備。樓臺頻徙趁時新。京華却憶王門客。投刺今朝正逐輪。京師是日但端坐車中。遣人投刺。可一日而畢。

初四日携眷至曹大姑家賀新

又酌大姑酒。紅爐盡室圍。雪消松葉健。春早杏花飛。米貴飴糖少。錢挑爆竹稀。離牢何患犬。脯市漫呼豨。兄妹看華髮。兒童笑覈肥。已完向平債。何恨老萊衣。但使年年會。無妨事事違。螟蛉終式穀。教誨莫愁饑。

感春

是物從新發。惟余依舊衰。眼昏須鑿鑿。西洋眼鏡名。齒缺怯錫飴。栽果何時大。看花隔霧疑。昨朝癡絕甚。銀杏種千枝。銀杏亦名翁孫樹。書翁栽而孫始得食也。

春初蔣少尉蓮洲玉墀枉駕同登函海樓

上接青天下接潭。請君樓底小停驂。望江不見江還遠。函海何曾海可函。十里棠花蜂採蜜。百株桑樹婦

縹緲民憂民樂居官事如此風光可似南。

謝陸孝廉樹英寄端硯

樹英廣東高要人己亥中式余視學時所取士也其父文祖爲屏山令隨任至川遣人送硯。

人遠懷鈴峽書來自馬湖惠余好端硯因爾重明珠眼潤驚鸛鶴斑新辨鷗鵠著書方火急肯令皮閒樹。

蓮洲送湖筆

誰把羊毫縛吳興筆匠纏齊名毛穎傳合配薛濤賤行草隨吾意橫斜豈汝愆縱教俱老禿那及我衰年。

初六日蓮洲座上聽燈曲戲贈

自是州城樂事多元宵未到早笙歌春蘭不用夸芬馥遍體生香究讓他。

人日蓮洲送茱萸

聞有鮫人似海魚潛居苦織勝羅敷忽從機上雙垂淚傾出盤中萬顆珠火任烹熬丸倍小水纔略酒彈偏巖我家正在湖邊住試問蓮洲有種無。

初八日陳國璉送紅米

聞爾饒紅穀多爲養母儲分甘先惠及此意實憐予烘出胭脂飡全疑莧菜蔬暮年今得補顏看少年如。

題李鶴林振青聽鶯圖兼求墨蘭

今歲節差早正月柳已綠求友至綿城嚶嚶鳥鳴谷惕齋始遷喬種花滿書屋牆東有高士如鶴雞羣出。

示我聽鶯圖。正際鶯聲逐。春景與春晝。相映合成幅。昔有聽鶯人。雙柑以砑俗。千載復見君。肯讓戴子獨。聞君善墨蘭。亦與春爭馥。題罷索君蘭。可能贈一軸。

張忠送香櫟六株求薦

曾向泰安爲記室。却歸綿水守空廬。慣遲作答年來久。特爲香櫟寫薦書。

陸生見麟送紅梅二株移栽使邀同賞

屋名雖以紅梅錫。尙少成林梅幾株。但使着花三兩點。不妨老幹十分枯。蒙君割却雙身愛。使我新添兩侍姝。從此春風牢護惜。年年花放爲君酤。

栽紫荆

窗外紅荆樹。村中陸氏遺。忽思兄弟事。栽與子孫知。

精忠觀題鶴林墨蘭并序

乾隆癸丑花朝。余至綿竹。偕鶴林、惕齋、同詣忠武岳王精忠觀。觀鶴林所畫蘭。及惕齋題跋。屬予題詩。岳王廟在南郊三里。蓋張魏公家曾藏王送張紫巖北伐詩。後人因詩立碑。因碑立廟。故綿竹有岳廟。王湯陰人。鶴林亦生其地。其兄爲綿竹尉。故重修精忠觀。並添鑄秦檜王氏兩鐵人。跪廟前焉。

曉謁精忠觀。徐步入幽室。忽見空谷中。蘭花石背出。謂是靈均種。無人春自茁。坐久不聞香。乃知是畫帙。

鶴林忠州秀生叶夢蘭吉。有時揮素絹。人與蘭爲一。王亦生湯陰。綿南有遺筆。誼切鄉梓慟。丹臚換蓬華。旣已廟貌新。復思金石述。緬懷三字冤。千古芳名溢。故令寫奇香。爭光月與日。題句媿同心。趁賽薦有餽。回看兩鐵人。遺臭何時畢。

過玉局觀在成都北十二里賽雲臺今名壽佛寺

道經賽雲臺。古刹聳林麓。闕宮峙簪簪。相傳卽玉局。其洞青城通。其光鬼宿燭。玄元于此居。道陵有遺躅。刻石閉幽府。鏤像貯深屋。有人偶欲開。狂風驚拔木。不知廢何時。城郭變陵谷。黃冠半羽化。衲子聚成族。至今太清宮。時有五色出。唐像何處尋。宋君好尤酷。神仙亦設官。提舉假名目。雖曰惜龐眉。聊作老馬畜。東坡宰相才。遭讒屢放逐。自海移廉舒。乃敕銜兼蜀。其實未得歸。徒沾虛俸祿。空令天下人。來此每停轂。飛仙我未聞。思君我心獨。

宿妙相院馬射濱暨諸昆携尊見訪醉後作歌

馬氏諸昆皆老蒼。就中射濱白眉良。知我作客苦寂寞。携尊見訪東禪堂。維時大雨正如注。開窗共酌聽淋浪。不復序齒竟就坐。轉瞬瓶罄空壺觴。便有優伶解人意。歌聲鳥鳥兼笙簧。枯腸得酒高興發。亦自起舞如巫孃。羣兒拍手父老笑。此翁無乃今之狂。我醉欲眠客亦去。覺來晚鼓聞燒香。亟起呼僮吹火錄。錄其一半其餘忘。

西蜀饒林筵。南珍產箭筈。吾家水竹居。對門篋簪夥。常愁稚子出。竊被旁人裹。園丁勸早燒。帶殼計良妥。不須郢人斤。只借燧氏火。籜兮風其吹。衰矣時常果。肉食謝不能。禪參意亦頗。不交王子猷。只友文與可。食罷笑謂君。蔬筍氣真我。

鼻烟爲屏山令陸文祖作

烟乃口呼耳。誰教氣吸哉。種傳洋舶至。販自海關來。玉碾霏霏屑。珍盛小小罍。玻璃含潤澤。琥珀映胚胎。倒瀉壺常側。分遺帕甫開。手拈纔一撮。鼻嗅帶殘哀。乍屏如無息。相吹似有埃。爲誰頻作嚏。不慣却妨哈。香霧何須哩。醺人絕勝醅。驅寒禾不害。辟瘴地消災。貢品殊難得。多儀每走僮。達官腰例佩。對客讓交推。老朽何勞餽。功名念久灰。瓊琚何以報。詠物出新裁。

仙人橋井序

在德陽縣北二十里。雲笈七籤云。縣北十里。秦中治秦韓仲修煉之所。一名浮中山。橋所由名也。旁有秦真觀。今爲驛站馬廠矣。

嬴氏翦六國。黔首無瞧眴。賢者多避之。桃園共一事。云何雒水湄。亦有韓仲至。得非武陵人。別支居此地。當時巴苴平。蠻風尙敦摯。混沌日以鑿。往來豎郵置。流俗好荒唐。代遠傳聞異。人謬稱爲仙。吾特重高義。古觀創何年。長廊繫駟騎。田禾何時來。候吏倦欲睡。致令房牢落。案作馬槽餽。仲昔于此棲。吾今亦暫寄。樺柳一畝陰。蘆荻四面庇。誰家牧犢兒。猶爭角觝戲。

遊慧劍寺登夢應樓并序

慧劍寺舊碑有宋淳熙十有六年十一月甲戌邑人淳于震夜夢紫衣比丘入其家持化度牒既而又見持慧劍訪上人真公見其所衣之衣所出之書所誦之偈悉與夢同父子感異遂捨田三畝以充寺基不數年而真公果登正覺震亦陟顯位此夢應樓之所由建也事詳于寧波府同知邑人曹山夢應樓碑記碑爲嘉靖二十三年春二月望日造見立于天王殿前其殿樓則創始于正統壬戌僧源聰所建也壁間有五百羅漢畫像金粉脫落而神彩煥然洵明季高手惜爲近時俗筆重描失其真面目不免蛇添足狗續貂之嘆時湘維爲什邡令洗刷之功不無望焉同行袁生請紀以詩並限家字因索筆成八韵與山僧飯訖而去時癸丑六月二十一日也

殿敞花偏麗樓高樹不遮九層通日月四野聚烟霞青草蛙爲國蒼松鶴作家客來供苦茗僧解飯胡麻古井何時塞波崙後嗣夸僧言寺爲波崙祖師創割緣須慧劍應夢捨腴畬壁有名人畫描經俗手瑕誰能重刷浣賢尹定無差

時辰表

無針安解運有輪必須匙不出三分地能占十二時過遲蚊睫認太速馬郵嗤底事中人產徒供貴者嬉藏本生番地人稱活佛天祇因能灌頂多鑄小如拳飯釋非蘇晉思親學閔騫每從深室裏拜祝母添年

祝枝山草書手卷

張旭草書後端推枝指生。醉來頭濡墨。醒看目皆瞪。懍懍誰能識。縱橫見即明。若言是才子。我亦有微名。

和四弟編修鳧塘見懷三十韻

微官狗監慙。早朝雞人叫。供奉常不充。書思頻入告。僕夫厭饑寒。旁人羨清要。無嫌冷况多。所冀日光照。倘遇典文衡。志得展廊廟。八月主棘闈。三年提學校。囊橐載後車。負弩競前導。桃李既滿門。冠履稱高蹈。宴客出餘珍。置貨任所好。永謝蟄龍蛇。不差鄴虎豹。吾家南翰林。居職羨久耗。墨莊改舍人。僅得存禮貌。鳧塘例得遷。尚未展鷹鷂。今年聞考差。前矛有光耀。定擬徙鵬程。乘風鼓萬竅。能爲大宗師。堪究聖閭奧。不惟窮鬼送。且擬高官到。利獲豈山弋。名高不因釣。上達天子知。下慰慈母孝。如何夏徂秋。竟又出所料。彌月長引領。望雲頻落帽。遠信耳難聞。幾至目成眊。昨接汝書來。姑聽兄言教。鳴鶴在九臯。不同俗聲噪。老驥志千里。肯與捷足掉。茫茫誰復知。悠悠付一笑。閒宜博羣書。悶即長咏嘯。不但勿尤人。亦無怨大造。清本散仙言。空惜釋家妙。如果時運至。自有喜鵲報。

潞陽雜詩

緇衣誰授館。茅店半頽垣。織布晨機聒。然燈夜博喧。三星疑在戶。兩月不窺園。家有蓮池好。紅衣落應繁。白紵誰家婦。江邊學浣紗。草拖裙帶濕。花插鬢雲斜。年老誰投果。歸期悔及瓜。樂遊不知返。毋乃頓忘家。題袁生所藏編修查祥西施浣紗圖

西子未蒙寵。浣紗猶子身。幸無人鼻掩。誰識我心慳。賤日同村女。時來似洛神。君如擇佳偶。不在婦家貧。
狂吟客有求詩字。隱隱不已作此答之。十八轉草笠名九尺步地名也。

頭戴十八轉。脚踏九尺步。腕下走烟雲。口中吟月露。既非李謫仙。亦非鍾太傅。投筆竟出門。不知去何處。
彭縣詠古十六首

彈丸原是周彭國。曾與諸侯會孟津。漫把別賢來竊比。老彭便是此邦人。彭國。

牡丹舊數古彭稠。京洛遺風俗尙留。孟氏繁華能幾日。今人猶自說花州。花州孟氏移上苑。牡丹植此。

土地肥饒號小鄆。至今戶口更豐熙。牛心山下花如斗。不及良田一畝麀。牛心山。

東湖春水對西湖。髣髴山陰被禊圖。昔日樓臺今已圯。茂林修竹有還無。東西二湖。西湖爲唐元和守王。

潛蕭祐創。東湖宋元符袁晦有記。今俱廢。

南樓百堞壓城端。湖影山光動赤欄。誰似風流文太守。題詩千仞並巘巘。南樓文湖州。有回首大岷雪。千仞並巘巘句。

西比天彭。是此州。峭青危碧吐靈湫。要觀六月岷峨雪。試上西城望雪樓。望雪樓。

丹景蒼茫接翠微。太妃輦跡半依稀。臉脂不用夸嬌蝶。夢裏遙遙何日歸。丹景山。王衍侍徐太妃遊丹景。

太妃有蝶嬌。頗探臉邊脂之句。

聞道陽平有遺蹟。仙居觀已失金城。當年只是尋花柳。今日松風恨未平。陽平化。

大隋山頭景德寺。神照禪師錫所投。龍井至今猶作幻。滿山生竹盡龍頭。大隋山。
金覺禪林有大乘。洗腸池憶佛圖澄。鹿遊尚有遺民在。閭弱劉璋亦有曾。白鹿山。璋曾孫敞曾隱居于此。
後爲羅尙所害。

八十一洞若魚貫。二十四峯相蟬聯。至今葛瓊丁東水。疑是韋臯富貴泉。葛瓊山。瓊寄舉曰。他日富貴。無
忘葛瓊。遂建寺。

一泓水。濺珠如滴。三昧泉。盈斗可儲。一自知元洗人面。至今百疾盡能除。至德山三昧泉。

滴沅治。裏鴻都觀。響石關頭白石溝。高尙原來于此隱。虛傳范蠡五湖舟。滴沅治。范蠡曾學道于此。

石如蹲獸鑿爲船。泉向智陀環作淵。閑道清涼無暑氣。可能借我避炎天。上溪。

碧岫丹岑烟樹攢。龍懷山本似龍蟠。蜀中寺碣多名蹟。只數初唐王子安。王勃龍懷寺碑。

九隴雲峯盡出奇。二郎功德有專祠。石犀不動波濤靜。風雨長留誓水碑。李冰誓水碑。

江漲二首

迷離烟樹認難真。水漲東西不得津。何處酬神金鼓震。襄裳多少過江人。
不是貪遊久不還。故鄉雞犬不曾閒。朝來接得城中信。里派添追馬價錢。

水蠟燭

竟是天生燭。居然照滿川。任風吹不熄。經雨濕仍然。紅影搖波直。青藜逐浪圓。三條思往事。天祿愧當年。

挽計性成

年來林下孰爲儔。不是僧流卽道流。似我少於時輩可。如君須向古人求。琴諧桐爨知焦尾。盆接茶花換鶴頭。老圃故人零落盡。石瓜樹下哭遺留。石瓜樹不易栽。君以子種成樹見遺。今已拱把。

和張玉溪登萬卷樓觀金石古文歌

我家有樓。車山北。萬卷與山齊。嵯峨金石古文風所愛。皮置百帖時摩挲。吾壻坦腹右軍比。平生常換山陰鵝。今年省試遇伯樂。驪驪聲價什倍過。奇文百戰俱第一。當道自詡能搜羅。錦城錄詩遠寄我。不敢過譽嫌偏頗。常于酒間舉示客。寶光共說如太阿。坐令老翁不量力。笞兒累月學其哦。昨日遊庠枉駕過。適我遠出逃催科。興來登樓恣檢閱。碑版直欲窮岷嶓。百家探討析亥豕。六藝辨析遵止戈。斷字能知日月蝕。闕文姑任風雨磨。漢隸車馬推石鼓。張草蛇蚓分藤蘿。畫肚以指各有悟。箝口卒讀俱無訛。秦岳秦篆跡豈烏。岫嶠禹蹟文非蝌。後代耳食任穿鑿。古人伏泣潛滂沱。其餘唐宋如水旂。但有魚鼈無龜鼃。嗟予老眼昏若霧。對古每每形謠歌。野鷺家雞常見誚。蠹殘鼠嚼消無多。餘編尙留君把玩。得非天遣神守呵。與壻猶應勝與外。誓將罄送供劖磋。不然水火並劫篋。難保一朝其失俄。癡人千金買竹篋。蠻觸空笑爭角蝸。譬如日月厭菽粟。好奇遠想餐天禾。其中真贗誰復辨。索垢求瘢毋乃苛。不如自我且作古。揮毫知我摹伊那。後之視今。今視昔。今尤支派如江河。勸君不必嗜成癖。致令百廢嗟蹉跎。

九華石歌

何處飛來一拳石。鬼斧神椎鑿青碧。狂風驟雨送將來。流涎猶帶螭蟠跡。我疑蓬萊隕海中。海水蕩瀟鏤芙蓉。雲窗霧閣嵌窈窕。玉樓金闕俱瓊瓏。又疑太華三峯墜。玉女頭盆皆破碎。若非蟻穿九曲珠。安得蛇遊百盤地。十洲三島徒空聞。視此纔如一朶雲。此石焉知天地闊。誓乘羽蓋訪茅君。

煉丹臺在中江縣西四十里黃鹿鎮相傳黃鹿真人得道處

丹成人已去。惟有煉丹臺。黃鹿幾時返。白雲空自來。潼江江水日悠悠。不知春去豈知秋。今人不見古時月。古月仍照今人頭。青青四山草。危樓已傾倒。獨有登臺人。自嗟髮白早。

清江行井序

爲福公出征後藏過綿作也。公館之盛。亘古所無。因用杜詩綿州公館清江漬爲起句。

綿州公館清江漬。檠題畫桷高閨闕。水晶爲柱玻瓈檻。四面光射窗櫺明。紅羅細疊氎氎平。剪錦百匹懸爲棚。兩廊陳列充琇瑩。金枝向夕飛流星。九華照耀銅龍槃。洞房尙少卓倚屏。花欄紫檀民不寧。借問何官不敢名。田禾將軍方進城。一齊鐘鼓聲鏗鏘。肉山酒海人縱橫。三聲礮作晨登程。花欄紫檀俱隨行。

九日登函海樓

底事登高向嶺巔。危樓百尺可攀天。稻看穫盡黃雲後。菊喜初開白露前。竈婢能諳作菰飯。家僮閒蕩採菱船。年來佳節無絲竹。長笛聲從何處傳。

謁杜少陵草堂祠

詩自三百後。正聲淪憲章。流傳經喪亂。史官失其詳。惟公起大唐。雄文獨有光。天寶初應舉。起家從鞏昌。進士屢不第。歌聲益琅琅。召試核兵曹。感涕矢身亡。適遭祿山陷。奔走逾河梁。官拜左拾遺。始露列宿芒。吁嗟中原擾。兵戈沸蜩蟬。其時支大廈。獨有一汾陽。司徒惟不朝。遂令冷戰場。更兼燕兵來。回鶻何揚揚。腥膻遍宇宙。馳突氣益昂。練卒不得休。至尊誰扶將。坐令憂國淚。斗斛不可量。時議鄙房瑄。保奏披天闕。遂觸逆鱗。謫與凡鳥類。臨輔復大擾。孤身復何望。竄居同谷間。救饑日不皇。採松復拾橡。難以充饑腸。雖未赴京兆。聖恩何敢忘。讀公八哀詩。其音皆金商。幸有嚴鄭公。素厚知公狂。奏明列工部。賜緋出廟廊。結廬浣花里。新隕耒陽鄉。至今草堂寺。名與江水長。醫國少靈藥。疾惡如探湯。我公真詩史。俎豆誰同香。

武侯祠

南陽原是一名儒。魚水君臣萬古無。儒子不才非治命。託臣討賊是良圖。心悲王業三分鼎。力盡偏安六尺孤。綿竹雙忠俱血食。可憐累世爲捐軀。

忠武王廟

何須灑淚向西風。名將爲神少善終。鐵騎竟當追虜穴。金牌原不出深宮。獄成片紙千秋慟。名冠中興四將功。畢竟是非經論定。一編青史表精忠。

和張玉溪見過遊南村別業四首

水繞孤村四面流。隔溪修竹逕偏幽。維駒客已臨門口。叱犢人猶在隴頭。君至已慙重寫鳳。我生原是一

浮鷗相逢不用多相屬。萬事今如不繫舟。

倒屣誰能使我迎。非君問渡任舟橫。林間鶉婦欣携偶。架上鸚哥解喚名。飯赤却疑霞作伴。是日飯供紅

穀。茶甘終讓露爲兄。晚來携手樓頭坐。要看三更海月生。

門長荒苔一徑斜。如何強半不還家。風殘荷葉空存柄。霜打芙蓉臥放花。閒領琴僧伴風月。時邀道友話

烟霞。十年林下歸來晚。自泛漁舟着短叉。

水居合喚小蓬萊。綠檻朱樞一一開。不羨有官居殿閣。尙非無地起亭臺。池邊撫掌魚同躍。松下高吟鶴

不猜。除却能詩玉溪子。問誰應上此樓來。

和玉溪登函海樓放歌

愛君爲人眼能白。元龍豈是求田客。愛君文似玉溪生。直從碧海掣長鯨。平生樓居多惆悵。喜君來卽携

同上。萬卷縱橫任溯洄。百川環遶同浮漾。秋風昨夜林端來。繡榻朱窗次第開。造鳳手原殊草舍。彩鸞身

合住蓬萊。火棗不羨珊瑚赤。琪果不讓珍珠紅。海山三點看初霽。弱水萬里來長風。頃刻天邊月輪起。兩

人猶在鏡光裏。橫笛何人尙倚樓。十月梅花落江水。

小築四章章十句

水竹之居。吾愛吾宅。松陰爲幕。草茵爲席。徑自我開。苔鮮人跡。詩喜陶潛。嘯學阮籍。樂天安命。自適其適。

與其看花。不如看竹。與其樹人。不如樹木。萬挺臨門。千章繞屋。柳堤垂釣。桐窗展讀。伊與誰隣。吾尙未卜。

誰謂我貧。食不但非。誰言翁醉。意不在酒。懶卽曲肱。事無掣肘。陶情絲竹。適性花柳。問我何名。灌園老叟。生雖山居。能知水樂。願作汎鳬。不逐野雀。有船有書。有琴有鶴。背山築樓。臨流起閣。老漸常頭。收我遊脚。和玉溪題余東海人求近著書圖

字織弓衣人。價重雞林國。古惟白與梅。詩名播絕域。嗟我豈其人。如海以蠡測。虛聲愧昔賢。竊祿忝清職。丁酉憶在京。被褫心似棘。引罪自避嫌。僑居宣武側。是時遭國喪。蹕跡行無力。屏戶終日坐。面不求人識。何方使者來。敲門聲正亟。手持書一紙。開緘目驚拭。求我皇華詩。留伊蔬飯食。言自朝鮮來。名仰金玉式。特奉副使命。登堂見顏色。憐其心懇誠。贈似千金得。並繪我像歸。一方傳典則。去後復致書。兼索童山刻。時已荷聖明。超雪罪萬億。提學粵海南。不復相思憶。迄今二十年。百憂填胸臆。忽展求書圖。淋漓見翰墨。爰鵬何時來。鵬搏六月息。生隔天一方。奮飛恨無翼。

萬柳堂四首

大廈初成俯碧波。滿庭綠影舞婆娑。蠻腰對我老如此。鶯語同聽更有何。量到十圍春意少。坐來五樹晚烟多。憑君莫唱楊枝曲。聽我新翻別調歌。

長安曾憶曉風吹。萬柳堂邊有所思。東閣已空油幕影。北門猶望趨塵絲。一時賢輔推龍夾。千載文壇屬鳳池。自恨紗籠無分到。名堂猶效老鴻詞。萬柳堂原在京城沙窩門外。馮相國溥別業也。康熙己未。薦舉博學鴻詞。諸公出公門下。一時最稱得人。時酒唱酬。爲本朝盛事。余生晚。恨不得與。故用其名題堂。以志

何慕云

小西湖畔四圍青。無數垂楊盡日風。露葉滴來疑細雨。曉枝稀處見微星。院中落絮全堆砌。檻外柔條半入樞。猶恐宮牆生外望。水中別築最高亭。

鳳州曾見好垂楊。移向溪邊半列行。試問遠遮沽酒店。何如深蔭讀書堂。深柳讀書堂。唐劉昫虛詩。當門常納三千履。夾道添修十二廊。每遇清明桃放候。綠紅相閒好春光。

看雲樓

昨日山中來。又向山中去。遙指山頭雲。我在雲深處。

切磚三十韻得切字

唐堯尙土堦。夏后變垣墉。烏氏始造磚。陶人改爲切。每遇穰穰收。適與耒耜別。先檢田畝寬。後除沙石潔。風吹氣欲潮。雨多水宜泄。汲遣兩夫洒。乾防十字裂。叱犢侵晨起。駕牛終日繼。碾去碌礪忙。鞭來穀棘懨。地旣如掌平。人亦忘口啜。拖刀形似犁。負索力盡竭。直比牽絲繩。深剛合車轍。法全賴起鑿。光半疑冷鐵。其利玉能斷。不舍金可剗。劃泥如劃餅。履刃如履雪。布指使知尋。舒肘未妨掣。似葱不爽寸。如竹剝爲節。一翻一塊成。再剗再甃揭。到手已萬餘。過眼纔一瞥。片刻疊崇墉。午景方樹臬。擬磚尙須磨。名坯因待燕。富豪候出窰。貧家使取挈。予房牆苦卑。卜築匠未徹。夏霖遭汎漲。秋井塌園缺。有客什邡來。謀洗前工劣。許易新瓴甌。竟付舊畛畷。不日看成功。維時正寒冽。何但索綯乘。兼借茅廬結。外加朱粉飾。不異雕鏤案。

宣山詩集 卷三十二 癸丑

救急甚燃眉。廢食豈因噎。莫學陶侃。寧守扈累拙。

童山詩集卷三十三

甲寅

得同年侍御祝芷塘書却寄并序

自余歸蜀後。聞芷塘亦歸海寧。蓋不通消息者十年矣。今年春初。其門人新都侍御李尚菁。陽械回川。始得手書。乃知在雲間主講。全家浮寄。並云。病中無可消遣。刪改舊詩。每遇彼此唱酬之作。覺當年飛揚跋扈之氣。綢繆繾綣之情。如在目前。前後奉懷詩甚多。錄之不勝其錄。故勿寄也。又云。天涯海角。此生殆無相見之期。讀竟爲之黯然。因先以詩寄之。萬里迢迢。不知何時到也。

一函書自浙東來。喜極須臾變作哀。君尙在耶。鱗竟犯我。雖生也背如鮐。老來那有三魚夢。天下爭傳一鶚回。倘念將軍頑似故。松江莫惜寄鱸顚。

六十一效白樂天體作五古三十韻時寓舊綿州萬壽宮

五十已衰頹。六十尤羸弱。何況又加一。氣血日瘦削。鬚戟半如蝟。髮皓已似鶴。妻怪宵矢遺。人驚晨齒落。人喉需沸湯。暖胃惟熱藥。膈溫荳蔻煎。口適茱萸粥。常時尙可支。八月痼必作。發時終夜呻。嘔餘數日惡。絕糧如在陳。復歸乃於毫。延醫走什邡。嘗羹始一勺。就暄亦扶鳩。回陽乃躍雀。應作蟲坏蟄。底事燕巢幕。

昨日來涪城。意似到沙漠。風射愁壁穿。雨侵嫌幔薄。每代人糊窗。常破已慳橐。直疑藐爾身。不知何處著。幸儼萬壽宮。寬可三畝廓。終朝只在樓。經句不下閣。舊方畫葫蘆。新鑿戒杯杓。但慮心腹希。難逢手足託。攬衣嗔僕遲。饋藥少兒囑。有客誰鑿門。無伴自携鑰。掩關苦懨懨。攀鞍欠矍鑠。却憶梓里安。不受萍踪泊。偶塞婢添衾。稍饑妾搗酪。半背擁宋郊。一捻憐沈約。況有園植花。適我池初鑿。縱令缺謳歌。何至全寂寞。思之暮年宜。畢竟在家樂。誓當歸去來。勿爲識者謔。

一碗水

天女洗頭盆。移入華山裏。至今此山中。尙留一碗水。

玄武山

玄武形成龜與蛇。我來登磴日初斜。虎頭粉壁今何在。化作雲山一半霞。

大雄巖下碧潭清。如彈如拳細石生。天付巧工琢棋了。看人黑白角輸贏。山下潭中產黑白花石。邑民盛爲棋子。以售好事。

中江斗山山長王敏亭捷中邀遊玄武山用杜甫題玄武禪師屋壁韻

六十已齊頭。高懷闊九洲。三嶼誰作主。四海得名流。自小原名鶴。知交獨有鷗。除君誰益友。最畏共僧遊。

同王敏亭遊聖泉用王勃韻

一線來千嶂。朱闌護碧泉。竹間聽有韻。松下響無絃。渾若來川上。翻嫌住縣前。蘭薰應得句。好共寫雲烟。

離氣薰山酌松風韻野紆王子安原句也。

西橋水并序

西橋水中江西門江也。自綿州來經羅江縣至此始可舟。古巴歌云：豆子山打瓦鼓，陽平關撒白雨。白雨下取龍女織得絹二丈五，一半屬羅江，一半屬玄武。卽此水也。橋不知圯於何時，而羅江東門橋爲邑令楊周冕所建，今亦圯，因爲作歌。

白龍昨夜嫁龍女，狂風驟雨忽他徙。珠奩百寶俱隨行，遺下疋絹化爲水。此絹龍女親織成，二丈五尺曾量清。冰綃盡是鮫人淚，誰家拾得寧容情。急遣雷電下索取，半屬羅江半玄武。兩家相爭不肯還，並造雙虹鎮江滸。白龍勃怒雨師行，豆子山前瓦鼓鳴。倒捲雙虹入海去，年年渡口無人行。絹歸龍宮波濤止，一橋方成一橋圯。君不見玄武西橋已如此，羅江東橋又如彼。

王敏亭以韻扇見遺作詩謝之並和其韻并序

韻扇者內府銅版所刻佩文齋詩韻也。字如蠅頭，粘於便面，以便作詩檢韻。一日同遊北郊，福建館小酌。孟石軒以松牋乞余書。敏亭創遂字限韻法，余遂隨指鋒，爔供三韻，限茶罷各成七絕。敏亭詩先成，余詩亦就。遂以書牋，旣而敏亭以扇見贈，先是邑令毛明府見招乞書未答，故云。

筆掃千軍未脫鋒。昨宵深愧飽官饔。韻雖便取詩才退，只恐難將筋力供。

斗山書院山長王捷中諸生江陵

鐵畫銀鈎不露鋒。飽看書法勝朝饗。興來寫罄南山竹。萬斛陰糜不足供。

中江雜憶詩十首并序

中江名勝莫備於宋。邑令眉山程建用敍與蘇東坡一書。書云中江與東蜀號爲劇邑。以衰拙臨之。始至若無暇。泊半年而滯獄清。期年而庶事稍就。敍乃謀葺亭臺池館之舊。則西園之勝有環翠亭焉。亭面北而枕南。相傳以薛公田所建也。庭前兩株桐挺直無節目。高二丈餘。枝葉扶疎。亭後甃石爲山。傍植紅蕉。二面控掩以墻。墻間列詩碑。皆薛公與其子球任本路憲日。並歷政諸公所。作。袤百有五十丈。曰樂閑亭。亭之後爲頤正堂。夾堂皆植花果。堂之東爲潛閣。閣之前牡丹數叢。深紫色。此蜀花之鮮有也。閣後懸窗。窗外竹百餘本。紫如葦。纖如筴。森如束。高出簷際。皆廖公子孟創植。文公同爲之記。其亭雄狀冠於邑。居西有臺高丈餘。榜曰觀風。登臺倚闌。其南北與西境山川歷歷可觀。惟東則爲亭屋縣樓之所蔽。西有栖妙山。山有洞。田真人所居也。今爲集虛觀。古記云。此地舊多惡蟲蛇。唐廣德中。真人自南陽來。卜居其地。遂絕此患。南江自綿之神泉縣來。衝山足。已而東。凡百五十里。至郡城下。合涪江東江。來自涪城。歷馬橋鎮。過五成山。至玄武山下。入於南江。二江之水。冬或可涉。夏秋積雨。往往漲至數丈。爲墊溺之患。歷政禦以隄防。廖公有碑。亦與可之文也。五成在邑之艮地。山頭有二圓崖。高徑各丈餘。俗號挺眼。以邑民多頑悍稟賦。於是前令修堤。命匠者塊之以爲堤址。今無矣。觀山之狀而詳其名。則五成者。取爲壇五成之義。

今以成爲城。誤也。玄武在邑東。其山周回三里。六屈三起。有龜蛇之像焉。昔之邑名與山。皆取於此。僧寺枕其麓。榜以大雄。而玄武之象。實寓其中。其下有淵。淵前後石大如拳。小如彈。連延五七里。有龜甲之文者。又有蛇蟠之形者。濱江之民。琢之以售好事。此物理之不可考也。觀風臺之南。有一亭亭壁塑亂山。榜曰栩栩厓。取夢蝶之義。昔官于此者。或譏其晝寢。彼固以此爲名。建用因而廣之。以塑峨眉山景。而致其意焉。建用昔寓峨眉六七年。歸吾鄉而卜居於北郊。則又遠與之直。每春晴秋曉。則夫蒼翠峭崿。巍然當吾廬之門。自從官於茲。別是山也。不爲不久。而歸遊未有期。故形於塑。塑匠邑民也。亡慮百餘人。凡兩川釋宮老廟之象。與夫豪貴之家。欲狀山川禽獸草木之類。莫不出于匠。邑選其匠之尤者。而指示以圖。于是曲盡其妙。自公之暇。近而觀之。由其足而循之。以至于頂。磴道橋閣。相屬如線。僧寺山洞。皆如其地。塾雷之穴。光相之巖。枯木飛瀑。鮮不悉備。恍然以爲昔年之旅寓也。遠而觀之。瑣碎不能分。而大勢橫抹天半。忽然以爲出吾廬而倚衡門也。嗟乎。玩其塑以爲真。其迷可笑。然窮其真。亦何異於塑。而玩之者。未能離形骸之內。則真塑何所往而非迷。况區區之跡。旅寓之年。與夫去北郊之居。逾二紀矣。淒然傷齒髮之暮。而彼崔嵬者。不失其故。不知冥冥中去者。彼亦不得而遞。此於道未明者之所爲。豈可以累於通人哉。建用欲易栩栩之名。而記其所以塑壁之意。恨才力之不逮。故舉一邑之大槩。以似明公。雖叢爾之地。不足以挂文翰。亦願明公命一名。撰一記。使不才之人。得以附諸末。幸也。子瞻答書云。軾啓。自

別永久多難流落。百事廢弛。不復通問。獨吾兄不忘疇昔。時枉遠書。感忤不可言。讀別紙所記山水園亭之勝。廢卷閉目。如到其間。所要亭記。豈敢于吾兄有所惜。但多難畏人。不復作文字。惟時作僧佛語耳。千萬體察。非推辭也。遠書不欲盡言。所示自是一篇高文。大似把飯叫餓。聊發千里一笑。會合無期。臨書悽然。按宋詩紀事。建用字彝仲。眉山人。熙寧進士。又茗溪漁隱叢話。東坡言余幼時里人程建用。楊咨家弟子。山會草舍中大雨聯句六言。建用云。庭松偃蓋如醉。楊咨云。夏雨淒涼似秋。軾云。有客高吟擁鼻。轍云。無人共喫饅頭。卽此人也。合觀程蘇兩書。則中江勝蹟。全在西園。惟樂閑亭。文與可丹淵集記作堂。世代歷更。陵谷互易。問之邑令毛公。不但不能指其地。竟不知其名。而縣志草索並此兩書失載。因全錄之。以附毛公。兼依建用書中所記亭臺堂閣。及近山古蹟。作西園雜憶詩十首。亦願常事者補之。乘末庶不至前賢名跡湮沒不彰也。

憶昔西園客競題。薛家環翠到荒基。問誰詩可垂玄武。杜甫何曾自立碑。何年顧虎頭。粉壁畫滄洲。杜甫題玄武禪師屋壁詩。

憶曾遍訪樂閑堂。廖尹新移自福昌。亭閣只今誰畫得。湖州有記當元章。文同丹淵集樂閑堂記云。河南廖君自福昌移至此。

憶昨仍題頤正堂。夾堂花木盡芬芳。任從改換官名姓。難誑山高與水長。頤正堂亦廖令所題。官今仍之。而改書己衡也。

憶堂東首有潛閣。無數牡丹開紫紅。閣後懸窗窗外竹。子猷安得入堂中。
憶臺名自榜觀風。三面雲山笠檻中。只有正東看不見。烟霞隔斷庾樓風。
憶聞此地夢中俱。栩栩亭前夢亦無。莫怪居官多晝寢。宰予亦是孔門徒。
憶余曾上峨嵋頂。又有峨眉在凱州。認假爲真原不假。嵎樓休認作迷樓。
憶登棲妙話田真。踏浪猶如履地平。安得道人驅虎術。管教猛虎絕無聲。
憶昔廖君新築堤。捍災彷彿似沉犀。如何不見民傳說。只有丹淵記裏題。
憶昔蘇程中表親。庭松偃蓋句猶新。大蘇不作西園記。作吏如程有幾人。

寧國寺

寧國寺前長閉門。入門秋草正縱橫。不須響壁教親拍。自有家中絲竹聲。

獨遊西山登集虛觀

江風慣欺面。山雲慣隨身。隔城望集虛。便如夙昔親。獨立風何狂。飄飄吹衣巾。雲獨似相招。喚渡遵江濱。
拾級上叢祠。乃無主與鄰。闕洞聚蝙蝠。豆田竄鷓鴣。深林下夕照。乃始歸城闌。明日人競傳。山中有仙人。
宿趙家渡有館人爲子納姻而欲易余楊戲答之

冷館闌然爇燭光。欣聞有鳳欲求凰。簫吹碧落鸞方跨。橋隔銀河鵲亦忙。尙喜主人容半楊。何妨內客竟中堂。老夫正要蟾宮住。玉杵今宵聽搗霜。

聞堦張玉溪懷淮秋闈榜發獲雋作詩賀雲谷親家

老斲輪原讓若翁英年獲雋與翁同怪君頗有譽兒癖似我方稱擇壻工陪譙草堂如昨日先參棘院坐春風人間快事無踰此佇看烟樓一擡中

甲寅九月十四日中允余秋室集副郎中范攝山鑒典試蜀闈榜發回京道過綿州枉駕見訪適余

遊中江不值以書問訊兼寄所畫蘭扇並索函海作二律答之

庶子春華久擅名新聞到蜀柄文衡出京方識詞臣貴入里羣驚鄉平聲宦榮畫裏芳蘭君子贈手中執扇故人情平生頗有名山業不遇名人不肯呈

雖在林泉不在家一年強半客烟霞行踪頗似孤山鶴尊大休嗤井底蛙似我非逃高士竹惜君未識故侯瓜深慙李邵天文淺未得觀星候使車

題春坊余秋室所畫金蘭卽用自題見寄元韻金蘭者用泥金筆也

扇有風蘭分外涼春葩原不怯秋陽寫來底用金都斷只取同心不取香

附自題所畫蘭扇呈雨村前輩

中允余集秋室錢塘

墨沼風生翠葉涼秋光又喜到重陽素心不在繁枝葉三兩莖花一國香

十二月初五日玉溪來祝余壽並告以明正將赴春闈作詩二首因和其韻兼以誌別

懸弧繞過壽筵期又賦乘龍北上詩倚馬萬言真快壻家駒千里常吾兒讀書目或十行下得句時參一

字師更擬潺亭春水動。看君破浪上雲遠。
九重是我舊巢痕。累葉無人繼國恩。此去上林枝定借。應聞大樹號猶存。玉壺冰鑑知非謬。清廟明堂品最尊。倘遇故人相問訊。爲言寂寞老江村。

附

張懷滋

來朝走馬定行期。奉祝翻成奉別詩。一劍橫腰如健僕。六經使熟似呼兒。西川才子吾推岳。東粵文章衆所師。此去膝前勞想望。五雲深處是天達。
和成斧鑿見詩痕。問字常蒙拭目恩。漫道燭花三夜結。須教椿樹百年存。書廚勝許外人看。詩話嚴於老吏尊。多少名卿皆後輩。問翁何故老南村。

哭大壻候選廣文何異齋耀茹

老來亡壻不勝悲。萬斛泉如涕泗垂。官僅廣文無命受。任隨觀察有何遺。名能蓋世曾三薦。才可匡時未一施。爲報黃泉差自慰。嶄然頭角有佳兒。

不信斯人竟玉埋。蓋棺未定尙疑猜。今年會祇謀三面。昨日書猶寄四顛。三日前曾寄雙魚。臨死無言惟跪叔。卽九臯。知君遺恨在孤孩。南村詩話留名句。千古臺山不夜臺。壻家臺山。

寄姜太史爾常勸余主講錦江書院詩以辭之

野鶴山猿孰肯收。只宜林下任悠遊。平生從未居函丈。老命何堪換束脩。况有笙歌蛙兩部。難離奴婢橘

千頭題詩寄與姜夫子。病馬如今不受鞦。
傅粉塗朱滿面描。常年同院本輕佻。誰容絳帳兼携樂。肯爲臯比別愛嬌。能坐豈無時雨化。出行常畏朔風飄。老來更以人爲暖。只恐諸生認宋朝。

再和姜太史主講見寄原韻

十年從未入州城。只有江鷗與狎盟。若道太平真氣象。書聲畢竟讓歌聲。

附

庶吉士禮部主事姜錫嘏爾常內江

三年奚不到蓉城。高據文壇作主盟。一席錦江君就否。歌聲聽罷又書聲。

童山詩集卷三十四

乙卯

正月初二日題曹大姑壁

今年春興比前超。鑼鼓隨身破寂寥。高親去聲家中啖牛脯。曹姑宅內喫猪腰。人逢日暖神增爽。鳥遇天晴語倍囂。我妹明年交六十。管絃預當賀生朝。

初六日偕何九臯入鶴河村觀燈

不到元宵已管絃。况逢狂友更欣然。雖無寶馬香車逐。都把山猿野鶴牽。贏得春盤先到口。偷隨年少共摩肩。明朝定有人傳說。兩個詩翁老欲顛。

紅梅八首并序

陸生見麟家有紅梅一株。大可拱把。色分深淺。蓋燕支點絳二種接成也。每年春開。爛若赤雪。生曾分二本貽余。余紅梅書屋所由名也。今年乙卯人日。自携家樂。邀何九臯同觀。主人置酒其下。聽演紅梅傳奇。爲作一律。異日州尊廬陵王雲浦。用饌。首以詩寄和。旣而綿竹令清江楊實之。學光。什邡令會稽甯湘維。鎬。彰明令河陽馬海門。元龍。陸續繼和。於是遠近聞之。自仕宦縉紳。以至

釋道女媛和者不下百餘人。余亦自和。疊至八首。遂成紅梅詩社。可爲此花生色矣。陸生棠爲紅梅唱和集。亦可謂好事也。爲綴數語於首。

一種春風兩樣分。漫言間色奪繽紛。淺深絳染江邊雪。遠近赧烘嶺上雲。人倚闌干同笑語。天教闔苑入芳羣。當筵更奏紅梅曲。要算霓裳再得聞。

玉皇初降曙光分。臚唱花魁侍從紛。御酒醉叨三滴露。賜緋披下九重雲。人間桃李俱無色。天上瓊林獨冠羣。回憶朱衣曾暗點。頭名姓字愧無聞。

施朱施白總難分。瘦質清姿尚未紛。洗出朱砂疑是雨。迎來紫氣欲成雲。春風有面微醺酒。明月無情不入羣。自是君身換仙骨。丹砂妙訣可容聞。

漏息春光恰二分。暗香疎影已紛紛。笛聲吹落燕支雨。鼎氣熏成寶箴雲。丹的似經宮女點。珠丸如擲狹邪羣。可憐不作朱門客。只許鄉村赤子聞。

叶萼含苞渾不分。開時濃淡漸紛紛。嚶來酒點疑仙雨。綴遍丹丸訝火雲。呼作紅兒應不稱。依然青女配爲羣。休言薄命朱顏誤。如此清粧共豔聞。

問誰司練絢微分。着意烘成繪藻紛。林下美人疑彩虹。山中高士臥紅雲。近筵豔奪茜袍色。入戶羞同朱履羣。自是羅浮仙種別。等閒蝴蝶不知聞。

籬落墻隈一徑分。每逢春到必敷紛。偶因疎雨攪紅雪。爲傍斜陽化彩雲。笑頰豈邀詩老愛。酡顏應入醉

翫羣色香俱備真佳偶。和靖求妻恐未聞。
翹首蠻牋並未分。詩人聚和早紛紛。雙身影並矐矐日。萬蕊香堆匝匝雲。媚態不因醫癩髓。啼妝豈是學妖羣。自從落盡鉛華後。空谷杳然更弗聞。

附同作

何人鶴九皋

一株開作兩株分。詩老平章爲解紛。酒列聖賢如孔孟。梅稱兄弟是機雲。花因連理魁誰占。色爲爭妍黨不羣。自昔東坡題唱後。新詩又向雨村聞。

附和詩奉和李太史雨村先生紅梅原韻

綿州知州己丑進士王用儀雲浦廬陵

眼底春光併十分。成溪桃李愧紛紛。百花頭上霏紅雨。千樹叢中起絳雲。却似鮫綃染猩色。居然鶴頂邁鷄羣。朱顏似有天公惜。連日東風靜不聞。

綿竹縣令癸丑進士楊學光實之清江

占斷春光有幾分。橫斜疎影絕塵紛。亭前點絳飄紅雪。嶺上舒丹貫彩雲。祇恐冰容難入俗。略施朱粉也超羣。江南江北如相憶。化作雙身處處聞。

什邡縣令舉人甯 鈞湘維會稽

百里方亭古治分。紅梅幾樹亦繽紛。絳姿雖遜南村雪。丹彩還連北郭雲。詩友只尋姑射侶。醉粧誤入壽陽羣。謫仙已入羅浮夢。幾度招呼總不聞。

彰明縣令舉人馬元龍海門河陽

衝寒破臘幾時分。放出梅花異樣紛。花瘦清霜枝瘦月。光蒸赤日豔蒸雲。西湖賞去誰同伴。東閣移來信軟羣。樂奏霓裳供笑傲。雨村韻事播馨聞。

河南固始縣令己卯舉人張邦伸雲谷漢州

庾園春色正平分。粉萼朱苞照眼紛。姊妹誰家同醉月。弟兄揆藻總凌雲。初開合倩霞爲幙。遙望居然覓與羣。東閣邇來添韻事。兩番驛使寄新聞。

江西靖江盧元錦畫榮

誰家仙種醉中分。淡掃濃粧色互紛。訪去孤山疑落日。望來太史欲書雲。朱顏爲爾巡簷笑。紫色休教亂服羣。遙憶蜀州多雅詠。盧生夢裏幾曾聞。

漢州張懷溥雨山

寒暖枝頭影自分。略加顏色便繽紛。題詩官閣飄紅雪。載酒清江指絳雲。人立春風如共醉。夢回明月本同羣。揚州水部空相憶。只有東坡得共聞。

故庠生曹錫寶之配李小蘭李香

鴛鴦一樹被風分。無葉扶持落自紛。晚節誰憐人似雪。曉粧懶逐女如雲。紅顏薄命多新感。白髮回頭憶舊羣。驟雨狂飈今漸少。忽傳兄句到門聞。

二月三日至團堆壩訪孟時三丈適入山尋藥不遇見葉贊之天相毛殿颺德純兩秀才携尊邀至梓潼宮觀劇底暮盡歡而散

故友携尊枉駕過一龕同佛聽笙歌山中客去尋知母江上人來得刺婆蜀謂鱖爲刺婆魚古寺僧稀松葉少戲場人散蔗皮多甘蔗冬窖春賣兒婦尤喜噉之戲場爲甚多嚼其汁而棄其皮與渣焉十年不到團堆壩白髮看看奈老何

綿竹楊明府實之座上詠牡丹戲贈

牡丹如斗占春芳不枉嘉名錫作王八面雕闌居北極四圍錦幃擁東皇垂頭露重如扶醉對面風來掩衆香別有好花眉欲語勾他叛呂又何妨我欲勾他叛呂防趙雲松戲袁子才寵客劉霞裳句也楊明府時有寵客宋桂欲從余學故借用之

春遊

莫問山巔與水涯農夫相見話桑麻從吾所好絲兼竹匪我思存酒與花拄杖拋來行尙健軟輿到處便爲家無官却有君知否布被朝朝放旱衙

閏三月三日綿竹楊明府實之坐上偕姚占愚淳汪小泉心源盧晝榮元錦及余牡丹聯句

公餘開小讌實之閏月趁花期國色無雙譜雨村春風第一枝古愚玉樓人醉後心泉金屋貯嬌時漫說姚黃種晝榮名花出晉熙實之

訪沈新園崇德席上奉贈并序

新園寧夏人。本儒士。隨祖寓蜀。以祖習行伍。拔至綿竹汛官。非其志也。未幾告退。築室於邑之南郊。閉門課子。蒔花自娛。非知己不得見。不役奴僕。惟使二婢。一曰黃菊。一曰紅梅。而紅梅尤知書識字。客至則呼出侍酒。故末句及之。

偶過南郊訪隱淪。武身忽變作文身。園居第五橋邊路。屣倒開三徑裏人。獨坐梧陰親課子。時烹菜甲爲留賓。誰言東閣紅梅落。又見闌干笑語頻。

連山舟行四首

連山水渴漸成汀。傍水漁家戶半扃。艇載鷗鷺人載艇。一肩風過滿江腥。舟小須防重載沉。中艙只着二三人。忽然大噪舟全覆。赤脚行江更爽神。謳譟載道亦堪聽。乃是村中演小伶。水漲烟田苗盡紫。岸崩土餅草猶青。船行兩岸似飛還。蘆荻齊天恨不刪。聞有好山名未好。炎天誰過火盆山。

遊連山觀湧泉

混混茫茫湧不休。聞爲塘堰放爲溝。不知蛟掉多長尾。見說牛沉已數頭。滾滾珠璣千畝灌。邛邛權極萬家收。天公狡獪殊難測。能使民愁亦解愁。

雲谷接玉溪京中信傳余已作古人以書見示因戲答之

去年一病輒兼旬。此話傳來亦有因。科第已如祧廟主。姓名都似隔朝人。老而不死真原壤。疾爾何勞假洞賓。用旧重進事。從此天公應不管。免教重鑄二回身。

附得岳翁書深喜無恙和韻呈寄

張懷淮

書來剛記隔三旬。始悟流言未有因。天地多情留此老。山林有幸着斯人。選樓仍見青編富。拄杖應添皓首賓。細把新詩再三讀。却疑恐是再生身。

玉溪和前韻見寄並錄前作挽詩見示復次韻答之

常年伏枕命如絲。豈意流傳異物疑。死後招魂猶易返。生成傲骨恐難醫。怪來夢裏常逢堵。早已靈前暫代兒。從此名山採仙藥。但吟莊老不吟詩。紛紛名利究誰強。冷眼看來總杳茫。蝴蝶夢飛猶自樂。蚊虻暫過又何妨。此身且聽風飄梗。轉瞬惟愁海變桑。到底百年終有盡。果然兆是復真堂。

附聞岳翁已作古人爲位哭之作挽詩二首

張懷淮

忽傳凶信淚如絲。命也天乎聽轉疑。方謂高年能健飯。緣何小病竟難醫。倚閭心切恩同父。撫柩情疎愧當兒。西蜀暮雲頻悵望。不堪再讀送行詩。去年臘底記康強。追憶音容轉渺茫。詩可名家生不負。文能壽世死何妨。篋中書剩三千牘。身後田餘八百桑。他日小西湖畔路。童山重拜舊祠堂。

前蜀學使吳壽庭樹萱任滿回京道過新都邂逅話別後至綿驛復寄長句求余拙詩依韻答之
長笑貧兒室無有欲以千金享敝帚長羨富家擁阿堵屏常未盡藏身後多錢善賈詩亦然讀破萬卷錢
貫朽君詩過於王愷富綾錦珊瑚左右我詩甚於原憲貧捉衿見肘難抖擻君乃把飯仍叫饑豈能脫
出君窠臼自君爲蜀大宗師眼如懸鏡辨白黝首選余堵作青錢果掇巍科庶無負我時錦城方遍遊只
有君門不敢走何期今年持節回始康相逢初握手古人神交只立談今人面交神不久木鐸有舌已徧
搖石鼓無聲安用扣一代文章仰雙桂千古高人歸五柳相期壽世惟有詩只今誰是知詩友送君此去
會何期莫言老悖非吾偶他年再麾旌旄來家釀尚可傾百甌詩成人已在天上天上可曾一回首

附綿州館驛寄懷雨村觀察

吏部員外督學四川吳樹萱壽庭吳縣

官職本非有生有棄之奚翅却敝帚江山風月作主人詩名獨占千古後挂斗大印不足奇破萬卷書
真不朽慕先生名冊載前識先生面雙桂右升菴故里暫停車名紙忽枉驚抖擻此邦文獻溯丹鉛後
二百年傳轡白几几之舄岌岌冠六十鬚眉較我黝三載相思欲往從咫尺南村竟虛負仰蓋略申茶
笋香匆匆車騎復東走我來看遍蜀山春蜀山盡入先生手以樓函海海函胸開闢天地共長久曾從
玉潤聞冰清洪鐘却笑以筵扣撫卷能窺意匠真夏雲之峯曉春柳莊耶佛耶兼有之此福此慧誰與
友西川江水六朝山醒園隨園差並偶後學逡巡乏羔雉獻以長謠供覆瓿木瓜何敢望瓊瑤但乞先
生詩一首

八月十二日中州李鶴林振青邀錦江主講姜太史爾常張固始雲谷及余遊浣花溪置酒少陵草堂諸人戒不作詩惟鶴林畫墨蘭數枝粘杜祠壁屬題

寄語詞人漫沅牆文章那得杜光芒鶴林解得真詩意畫筆蘭花宮瓣香
帶草堂西荷兒招肯教杜老笑蘭荇風流試問今誰似四海詩人鄭板橋

九月十四日余姪朝壇榜發得雋是日回家祭祠適新都侍御李尙菁陽城自新都來賀邀同觀劇酒間舊疾復發翌日侍御問病口占答之尙菁時初起服

骨瘦如柴漸不支賀筵薄醉便支離人間好友歸田少天下傳人在蜀誰其可再乎忙止酒未爲晚也急刪詩數年假我天容否尙有樓頭書未窺

丙辰

春初與玉溪同賦梨花限魚字

不到園園數月餘梨花依舊放春初似知玉潤詩人到故露冰肌仙子如倚檻月斜猶見蝶臨池雪落誤吞魚老夫病起行常怯只向東欄住板輿

河村雜詩

今年夏雨太紛紛一望河村綠似雲莫道農夫書不讀秧田井字插成文

菱溪衝雨過菱溪。隔樹誰家叫午雞。松逕泥深人未到。忽然返照竹林西。

河村戲場并序

村間以戲酬神。謂之戲場。見陸放翁詩。所謂雨足豐年有戲場也。時方五月。河村演青苗戲。余往觀之。遇雨。宿曹大姑家。適社首送腰臺至。遂大醉。書於壁間。腰臺者。社首於優人午臺住演時。以酒肉相勞之名也。

本因祈雨酬神戲。翻爲雨多酬不成。贏得豚蹄兄妹共。腰臺多謝社翁情。

高步雲親家問作詩法

詩思無涯語要該。摘章琢句費安排。請看大呂黃鐘調。略錯宮商韻總乖。

南村

南村樂事我能知。布穀催耕早駕犁。秧束卽將秧當草。竹林多折竹成籬。鴨雛生以雞爲母。農父心將犢作兒。待得秋收婚嫁起。家家婦子樂熙熙。

小樓初成

小樓結構稱家蘧。也費鎔銖細較量。何必仲將自安榜。定無荀濟畫吾堂。有時赤脚登初級。無數青山入短牆。莫怪屋椽都用竹。知音誰是蔡中郎。

馬尾口逢白雲山住持海珠乞詩作七律一首與之

入山偶遇白雲客。却恨白雲山未登。聞說來從峯萬丈。自言親造殿三層。祖師但化無非佛。名宦前生半是僧。道是曹溪人不信。黃梅能數六傳燈。

春暮過陳華國園亭

亭似一拳小。曾經三次過。開窗花氣入。倚枕樹聲多。壁有龍蛇活。門無鳥雀羅。老來愁骨冷。爐火送春和。

再題新市鎮店壁

新市今來第二遊。荻花依舊映清流。笙歌老後聽無味。酒盞拋來孰與酬。冷暖人情似冰炭。腹心奴僕亦戈矛。昨宵聞得山鵲語。底事當歸不肯休。

石橋灘雨漲宿觀音堂二首

石橋灘上一庵孤。霹靂雲垂樹若無。水滿秧田全斷路。雨添柳港半成湖。每爲醉者所推罵。竊喜人皆不識吾。魚服由來多溷跡。何妨濁淖共奔趨。不是雲遊是雨遊。款門無怪宿難投。白頭正欲一庵臥。青眼誰能十日留。隴上稻香知歲稔。牆邊花豔任人偷。何時否運翻成泰。問卜思從季主謀。

得袁子才書奉寄二首并序

錢塘袁子才前輩。己未館選。宰溧陽。調江寧。遂解組不出。於金陵築隨園以終老。余嘗讀其詩。想見其人。曾於視粵學時。刻其詩示諸生。乙卯。余同年王心齋純一。回金陵。乃肅楮候問。今年五月。

十四下江紅花客船到。從心齋信得接子才書。娓娓千言。不啻覲面。兼寄近刻七種。並索余函海。以數所傾慕之人。一旦得聞警效。不勝狂喜。因作二詩奉寄。

仙山無路得登龍。忽得隨園書一封。七集寄來如拱壁。千詩讀罷若撞鐘。天分吳蜀何時聚。人是東南一大宗。只合黃金鑄臨汝。幾多名士瓣香供。

子才真是今才子。天賜江淹筆一枝。要與江河同不廢。獨開今古別成奇。詩名不讓少陵占。遊屐惟應宗炳知。天下傳人當首屈。不知附驥更爲誰。

附奉和李雨村觀察見寄原韻

己未庶吉士江寧令袁枚簡齋錢塘

訪君恨乏葛陂龍。接得鴻書笑啓封。正想其人如白玉。高吟大作似黃鐘。童山集著山中業。函海書爲海內宗。西蜀多才今第一。雞林合有繡圖供。

蓬島仙人粵嶺師。栽培桃李一枝枝。何期小稿蒙刊正。竟示羣英謬賞奇。面與荊州猶未識。音逢鍾子已先知。醒園篇什隨園句。蘭臭同心更有誰。

寄祝袁子才八十用尙書畢秋帆沅前韻兼以奉懷

夙仰奇文萬丈光。君於李杜別生芒。六七月間始通訊。八十老來猶報章。才更何妨官百里。散仙不在展三長。如今髦鬢行將過。仍說披吟日夜忙。

寄到雲箋萬口傳。蜀中人競寫新篇。若仍對策同梁灝。倘使同舟或郭仙。地占六朝多勝蹟。天教一老享

高年問君。顧養遵何術。莫是曾餐太華蓮。君曾檢發陝西。以縣令用。未補卽歸。

何人不識小倉山。獨我無緣未款關。老始接談徒紙上。向曾選句遍坊間。也貪花酒偏多壽。儘有交遊不礙閒。自歎問奇空有志。天涯無奈鬢毛斑。

真是儲溪一隱淪。非熊不夢夢長生。遲方得子真英物。晚序同人半大賓。文遍雞林通異域。詩傳蛾黛滿江濱。有名有壽君兼占。借問從來有幾人。

附祝袁子才前輩七十

尙書湖廣總督畢沅秋帆太倉

巋然江左一靈光。星宿羅胸句出芒。山水靜留真歲月。烟霞絢染好文章。何人御李思懷刺。此事推袁果擅長。春到杖頭原不老。雙丸物外任他忙。

元相才名出禁傳。雞林紙貴豔新篇。筆雄繡虎詩兼史。影落飛鳬吏卽仙。綠字養心花養性。碧山同壽鶴同年。回思上表成婚日。曾撤明光寶炬蓮。

園裏樓臺江外山。盍簪曾記款雲關。地兼綠野平泉勝。人在青蓮玉局間。官職拋纔全福占。詩名成爲半生閒。別來未取紅衫浣。猶帶倉山冷翠斑。十八名場半隱淪。鹿啣芝草伴長生。六朝風骨餘金粉。五岳真靈作主賓。燕喜尊開蘭渚會。鳳簫聲遠洛川濱。祝鳩寄語須珍重。己未詞臣有幾人。

童山詩集卷三十五

丁巳

二月十八日宿張可恆醫室

一間藥室兩間床。剛臥童山一老狂。只恐壺盧裝不下。長身擠壞費長房。

白魚鋪有彭生饋鹽魚有感而作

惠我誰能及老彭。得非膠鬲饋余烹。老來作事真堪笑。尙捧乾魚欲放生。主人恩義未全衰。枯骨何時再畜池。尙想當年魚水契。如今空作過河悲。

乾隆五十九年余過白魚鋪偶坐茶坊主人尹姓乞詩贈以二十字云路往什邡城茶坊要留句也
算途中知己偶一遇。今再至則坊已易主。有粵人張良宗尙能背誦出楮乞書因再和之
舊時已遺忘。君能述吾句。如何在粵時。此才獨未遇。

偕禮汀訪法參

禮汀春盡邀我遊。爲指法參居林邱。風知客到門先啓。雨打花殘徑更幽。我見古柏戲相揖。昂然不動塔前立。畢竟牡丹鮮迎人。澆之以茶使沾濕。

禮汀有盆蘭爲縣尉周青門所借既而見還並謝以詩禮汀邀余與釋際徹法參同和
蘭花何必定禪堂空谷從來總是芳一自善人同室後至今坐久不聞香

附原作

周佩蘭青門

九畹清姿傍法堂移來小署挹芬芳拈花微笑西來意只合仍供佛座香

達徹禮汀

附同和

幽蘭原愛居陰谷偶近陽光便吐芳底事花來卽萎謝爲因福過減微香

際徹文殊

白甘老醜隱山堂忽向拳盆挹露芳但得春風輕護惜不居林下也幽香

法參

盆蘭一自入琴堂遂覺閒花百不芳富貴場中留不住仍回林下散清香

羅漢寺和縣尉周青門佩蘭壁間韻

竹林深處鳥關關借得亭臺盡日攀礪齒有泉供我漱點頭無石任他頑學歌僮蠢舌都敝乞字人多腕
不閑年過六旬猶作客祇因癖性愛遊山

贈唐萼光秀才

聲名久已擅文場鬚髮如今半帶霜人說解經如孔鄭我憐書法似蘇黃封碑羅漢同鐫石設館鑒華不

下岡爲問高徒七十二。可能藝過右軍王。

茂州廣文車孝廉粹齋書涪州人寓什邡白魚鋪枉顧並邀至家出所著詩文爲贈二絕

近來州郡無佳志。細讀君詩志不如。聞道岷山江水出。可能再續導江書。

貴妃原產茂州鄉。遺下胭脂水亦香。可惜無因見傾國。玉環生性愛霓裳。君有愛姬武氏。茂州產。是日以

觀劇未獲見。

再遊嘉定凌雲寺僧涵池詩詩爲題大佛巖上

老來久棄遊山屐。又上凌雲陟九巔。山色戀人留不得。灘聲恐客漸思旋。花能解語工勾引。藕爲多絲屢斷連。堪笑金人成佛後。葛藤依舊滿身纏。

燕子曲在德陽作

朝見燕作窠。暮見燕生子。子成已飛去。客猶在堂裏。燕子在梁上。客子在梁下。同是借居人。相看莫相怕。高居避鼠貓。哺食覓蟲蟻。可憐燕一生。辛苦只爲子。燕子家何處。雙來亦雙歸。如何獨居客。不得效于飛。

睢水關

風聲兼挾雨聲驕。河下灘聲夜夜朝。聞道山中新有虎。望兒不憚隔山臨。

八月初五日玉溪過訪園桂花盛開同作

無端風浪走天涯。拾得明珠手內擎。奔月蟾蜍仍返窟。駕雲玉兔未還家。客逢衛玠神先爽。樹遣吳剛斫更賒。此日同來金粟藏。人間香國不須夸。
金丹點點滴蒼苔。夢裏聞香眼始開。已分飛花雲外去。誰知桂子月中來。風飄雨打雖無主。日暴晴吹豈有埃。道是仙胎人不信。廣寒宮裏再親栽。

附

張懷淮

風雨連朝好駐車。阿翁別業在烟霞。老來性辣真同桂。樹到秋深始着花。粟粟低垂高士屋。紛紛香過別人家。一枝忙喚兒童折。插向盜瓶故故斜。
四桂扶疎四面開。小軒延月共徘徊。果然子落人間少。信是香從天上來。翁向西河求玉斧。我陪北海飲金杯。而今要借淮南種。好看叢生滿澗隈。

和桐城姚姬傳篋太史見寄元韻並附寄祝芷塘袁香亭兩同年詩

自分相思夢寐間。忽聞消息慰顏顏。九年坐擁南京席。萬卷高於北峽關。聞與王維談佛近。
謂王夢樓先生。應知袁虎共舟還。謂袁子才前輩。自慙蘇老甘心退。尙悔從前作辨姦。
桐城驛路雪霜間。憶在君家醉別顏。往日爭馳龍尾道。只今高臥鹿頭關。故人半受衡文聘。
謂孫心蔭。祝芷塘。張幕青。王少林。皆作山長。英物先看奪錦還。長君已登壬子鄉薦。我輩功名真似戲。何須核實論忠

姦。

附原作寄懷李雨村同年

癸未庶吉士刑部郎中姚 紹姬傳桐城

故人與我尙人間。衰髮無多皺滿顏。地勢最難通蜀道。天涯各自倚江關。流傳文筆知消息。愛賞溪山孰往還。閉戶不妨論事業。發揮潛德又誅姦。

和姚姬傳寄祝芷塘韻

吳蜀相望又十年。餘生難買下渝船。應知蒼鬢看俱老。可得紅顏似少妍。淞水半江并剪外。錦城雙節浣花邊。煩君就近因風問。去歲書曾到海壖。

附寄祝芷塘

姚 鼎

君住華亭五六年。東風輒爲望江船。料應玉兒貌同。今衰醜。却誦瑤篇轉妙妍。地上朋儕餘有幾。天涯風雨颯無邊。白頭垂憶平生事。又寄傷情到海壖。

和姚姬傳寄袁香亭韻

當年同第望龍頭。有客傳能造鳳樓。內外分頭各南北。功名到手幾春秋。機雲聲價馳吳地。軾轍文章遍粵州。獨我天隅甘寂寞。江干日理釣魚鉤。

附寄袁香亭

姚 鼎

同歲書生盡白頭。異時江國共登樓。蕭條身世餘孤策。歷落山川又九秋。雲出易迷巖曲岫。鴈飛難到

海南州。却聞壯事猶能作。談笑吳霜拭佩鉤。香亭書言在南壩治兵。

送侄朝埏舉乙卯鄉薦北赴春闈

自汝少多病。讀書愁太勤。誰知三載闕。聲忽九秋聞。滄海珠寧棄。瀛洲席應分。老人扶病送。徙倚到斜曛。

答學士王春甫懿脩寄懷原韻并序

辛巳孟春。忽接春甫同嗣君編脩蓮甫宗誠書。並以詩問訊。有身倦暫思依錦里。才高直欲上青天。荆高燕市歌相和。日斷冥鴻向左綿之句。時春甫已予告。留京就養。蓮甫卽乙卯蜀闈朝埏座師也。余醒園竹林有何須問三字。用王子猷事。來書以爲佳。故末句答之。

宦海真如海上船。雲帆轉眼忽無邊。我無官興應歸矣。君有微疴可霍然。却羨小郎扛大鼎。頻教短李望長天。竹林實有何須問。乞賜書題到左綿。

七月十三日遊昭覺寺是日甚熱

長林雲氣鬱蒼蒼。六十年來始徜徉。十里稻黃金布地。萬竿竹紫鐵爲槍。僧房真箇如冰冷。官路居然似火湯。圓悟禪師今不見。誰將六祖塑中堂。

昇仙橋小憩卽馴馬橋

秋陽如飯暫停車。馴馬橋頭喚急茶。怪道行人盡攜藕。橋南無數白蓮花。

寄酬雙流縣鍾明府逢泰并序

明府。余典試粵東時所取士也。今年七月十八日。余因追亡至邑。告以故。立即捕獲。梃責。並贈饌金。蓋師生相看。漸皆皓首矣。臨別爲之惘然。寄詩志謝。

自甘老病臥江村。不意今秋復出門。師友重逢如夢寐。鬢須相看各銷魂。門懸白棣風霜肅。杖過朱衣雨露恩。細數及門人七十。目中惟汝一人存。

重陽偕玉溪登半天亭

從來佳日是秋多。老怯登臨可奈何。喚作半天仍半地。却能望水望山阿。一生不作蟠間乞。雙塚曾吟陌上歌。是日望見姚趙二姜墓。興盡只思歸去好。吾廬尙隔一池荷。

附同作

張懷漣

重陽作客到綿州。且把登高當出遊。楓葉雨來人戴笠。菊花風起蝶飛樓。巴東聞說添新鬼。地下誰能喚醉侯。却笑我翁天半立。蒼生何處不擡頭。

困園雜詠二十首

擘破莢中細。纍纍珠相似。美人雙淚垂。錯認相思子。紅豆樹。雙雙紫蝴蝶。飛入西園道。栩栩不肯歸。化作園中草。紫蝴蝶。我有綠雲扇。寄在瞿曇家。年深用不得。變作碧蓮花。海芋。金釵以爲股。雀髀以爲莖。筭是誰家墮。春來石上生。金釵花。

江南有奇草。空飄能作樹。至今零陵人。生女白如瓠。通草。
翠匙不啗羹。綠箸乃如桼。花吐禹餘糧。草比堯時莢。筋子根。
應是巨靈仙。遺得拓山手。捧出太華蓮。長獻西王母。仙人掌。
吾聞秀不實。未見實不秀。却勝多稼田。可備荒年糗。無花果。
庶羞三十珍。燕食祺其一。昔爲天子嘗。今爲賤者贊。雷拐爪。
金蓮從地湧。蕊大却難開。爲問散花女。何時甘雨來。旱地蓮。
名蕉萎落異。非松剛介同。批鱗九重上。司甲萬花中。鐵甲松。
好於每見細。多才實爲患。不見鐵線蓮。尙有未開瓣。鐵線蓮。
有實曰棚杼。無實曰柞械。青岡秋風來。皂斗如雨落。青岡樹。
櫨珠可念佛。梔木能棒鬼。試問覲與巫。佛在鬼有幾。無患子。
蜀有黃連草。亦有黃連樹。蠅子藏其間。嚙人不知處。黃連樹。
柳綿飛度日。楸線正抽時。木王渾不識。認作蒜臺枝。線楸。
李乃仙之木。云何鼠李多。根株雖共族。鼠竊奈如何。鼠李。
藥性咀諳易。枝形比擬難。老身風易侵。換骨作金丹。九節風。
葉似虎耳草。花如鐵脚棠。何須羨松柏。小草亦凌霜。長樂花。

蟹紅嬌若醉。錦簇爛成圓。送與佳人插。飛鸞入髻邊。錦帶花。

贈命士彭玉輝

理窟從來元又元。惟君勃窣探根源。口如隋陸能雄辨。身似侏儒不飽飧。彭祖休誇八百歲。李膺只用五千言。相逢若各爭家世。亦恐難知本命原。

悼僕宋通

天津東岸是儂家。一帶垂楊江路斜。生小海濱漁艇上。誰教萬里到三巴。

歲暮高秀才步雪見過

清風動幽竹。明月上高梅。忽聞良友至。相與傾深杯。天寒地凍銀海眩。雪花如掌撲人面。不是高人那肯來。况遭俗物頻相踐。問君來胡爲。久闊苦相思。聞道行起用。勸駕切無遲。君言爲我懷誠好。所惜此言君欠早。百樹梅花我主人。我去只恐梅花稿。

釣魚竹枝歌并序

聞諸弟諸姪。日以釣魚爲樂。因作竹枝歌戲之。

穿遍清渠與濁渠。斜風細雨釣皆虛。萬家溝裏君休去。上釣無非小白魚。董家山上林家塘。緣木求魚魚半藏。前回坐處滿笊簍。今再來時携空筐。桃花魚美鯽魚肥。晨光出門星未晞。忽有巨魚截釣去。月明空抱斷竿歸。

熊家溝轉鹿家林。草笠芒鞋踏柳陰。一自拚塘人散後。一魚也不上敲鍼。俗以塘魚售人。名曰拚塘。
弟兄樂事世間無。童冠曾遊老亦俱。惟有九臯癡絕甚。隔林投石故驚魚。
釣客將蝦爲釣餌。塘翁以酒作塘媒。既施魚又兼施酒。落得朝朝醉飽回。

題沈家竹閣二首

沈家閣後好琅玕。四面清疎月一灘。昨夜乍驚風驟起。一雙拳雀話秋寒。
今宵萬箇更瓏瓏。風不搖時月正中。天遣月風傳畫本。粉牆筆筆活又同。

獨遊龍神堂訪寬戒不值有懷寂慧

人情翻覆幾時平。蠻角蝸中久戰爭。忽踏片雲何處去。空留孤月向人明。
性如薑桂應同悔。眼看滄桑世漸更。惟有堦前一池水。終年徹底自沉清。

預碑歌并序

仁和周謙字莘圃。壬辰進士。爲高縣令。乾隆乙卯年十月重修文廟。於大成殿後掘土丈五。得一
石碑。其文云。推算先天九九欠三。鼎造石井。擇修周官。愈陞愈美。越高越妍。諸生輔翼。科甲綿綿。
癸丁壬丙。龍真穴全。無怠厥職。令子肖賢。要知修者。仍是身前。隱沒當日。出現今年。碑旁大書預
碑二字。年月漫漶不可識。計廟修於康熙五十三年。爲姓石者建。至乾隆六十年。周君得之。實七
十八年。恰符九九欠三之語。建造姓氏。向址無不符合。亦奇事也。莘圃徵詩甚夥。余堦玉溪。其本

房門生也。屬余作歌。因賦之。時嘉慶二年丁巳十月初一日也。

乾隆乙卯月季秋。奇碑出自古高州。問誰掘得今縣尹。仁和進士其姓周。周君名謙字莘圃。前身曾作高州主。當年姓石今姓周。同爲此地民父母。適修孔廟建大成。鳩工築土聲登登。忽然掘地一丈五。康熙碑字皆可憑。碑文奇古十六句。蝌蚪盤螭句各四。鼎造石尹擇修周。旁書預碑雙大字。記年九九恰欠三。前因後因堪詳參。天地氤氲寧有意。妙合旋教作妙談。我聞佛氏前生事。見之正史僅一二。羊祜本是李家兒。五歲便知玉環取。王珉子爲胡沙門。初生能解外國語。其他洞冥皆非真。商芸張蔡尤欺人。王維畫師非宿世。李白如來豈後身。世人貴耳多賤目。翻因所見悟本末。桐枯生子原不死。蠶蛹爲蛾何須哭。蜃入海市能幻樓。不知前生原雉雀。鷹交春氣變爲鳩。不知前生乃鷗族。人言老不轉少年。不知子在如身然。臭皮脫去骨仍是。血肉雖流種自傳。偶因預碑一幕撫。豁然悟出萬姓譜。不知我後姓爲誰。但願亦如周莘圃。

